


WOONIHERYA MASU AWE

 Nrowe nuuramihe muru ahu okathi vakhani. Tithi Oophentiwa a Wirimu, hiyo nooxukhuru mwaha w'okhala va ohiy'ula. Hiyo, hiyo ninnixukhuru osuwela wira Mukhalelo Anyu ori vaava ni hiyo. Vano hiyo ninvekela wira Nyuwo mmurumeele khula mmosa a hiyo, ntoko simphavelaahu. Hiyo ninvekela mwa Nsina na Yesu. Amen. (Mukilaathiki.)

Ennikikhaliha saana okhalana miikoro iya sivaraka muteko. Khiyaareere okiwereya wira saahivelaveliha vakhani nsana, Mutthaka kahaareere-aka otthuna wira mwiiwe oratta-ene.

² Ni kaatthuna wira muhihiye woona eyo. Owo—owo nankura nirinaahu. Hiyo khanlimpe ni ekereja. Hiyo nri oolipa mwa Kristu, moone. Owo ti Ephiro yeeyo emosa paahi. Owo ti nipuro nimosa paahi n'olipa-vo, nipuro nimosa paahi Muluku otonko awe ohela Nsina Nawe. Nto Muluku ohimmye wira aamukumana n'atthu nipuro Owo othanlaly'awe wira ahele-vo Nsina Nawe; kahi mukhora pure, masi vamukhora Owo othanlalyaawe. Ni wira nipuro nenlo Owo aamukumana n'atthu, nto vaavo paahi. Nto hiyo ninnoona wira Muluku khonahелеke Nsina Nawe nipuro pi nipuro woohikhala mwa Mwan'awe, Yesu Kristu, ntoko mwaana kweekwe sinkuxaawe nsina na tiithi.

Nto vano nyuwo muniira, “Ahe, eyo eniheleliwa exeeni olelo? Khula mmosa oniira, ‘Miyo kiri mwa Yesu.’”

³ Owo ti Masu. Wira, “Wopaceryani naari Nsu, nto Nsu naari ni Muluku, ni Nsu naari Muluku. Nsu nihiipaka erutthu khukhala ni hiyo.” Emaara ekina, nave-tho yoolempwa mwa Wiisuupulula kapiitulu 19, hiyo namoonaru Owo orwaaka, Mwaakameliwa ni Mutheli, nlaya Nawe nootatheliwa Ephome, “Nsina Nawe aaitthaniwa ‘Masu a Muluku.’” Owo ti Masu a Muluku.

⁴ Ni, eyo ti wii, Owo ti owerya woovaha ekumi. Owo ti Eroho Yoowaarya ti yeeyo, i—ikuru sineettiha sinkela mukarumani, Masu, enkhalih Awo makumi. Ni sothene sihaana ovara muteko vamosa, ahiiso khenrowa ovara muteko tu. Ehaana omukuxa Bibilia othene, Kristu othene, Ehapari yooreera yoomalela.

⁵ Kintthuna kihimye, mwaha wa epaineeli ila koonalyaaka mutelevisawuni nsana ohiyu, kisuwelaka wira yaamurowa wooniheriwa, nto miyo kaahoona. Kintthuna kilavule mwaha wa axinna ala, yaawo yaarisa vapaineelini vaavo, erattelo eyo yo waakhula sookoha! Ni miyo ka namuulumela vanci-ene, moosuwela, khula enamuna, masi khiyaakhanle hat'etthu yoowuulumela vale. Yaari yooreera voomalela, ni kaamuwerya wiiraanana ni yeeyo, ipursentu emiya emosa. [Muthukumano onopa ikuphwi—Mol.] Kooxukhuru. Amen. Soowaakhula

iye saari soolikana vooপুরoni. Miyo vekeekhai yaahikisivela. Kaatthuna paahi kaarina efilime ene wira koonihe okereja waka owaani. Yaari yooreera saana.

⁶ Ni miyo kinnixukhuru vanci-ene osuwela wira—wira Muluku onnivara muteko mapuro makina, ohiya nikhuru nahu n'aPentekosite, ni onaakuxa atthu, epyo ele ya Muluku, yaaheliwe vale miyaakha iya sothene, elipelelaka Waarya wira waarye ohoolo waya.

⁷ Ni eyo nave-tho ennilopola, apatthani, wira nisuwele wira Yesu oohimya, “Okathi mwali ula aarumpe aapacenryaawe okela wira othume Makhura, owo waari okathi Mutheli aarw'awe.” Tivo hiyo ninniweya woona ni yeeyo, naawoonaka Episkopaale, aPrespiteriyaano, aMetotista, aPatista, aLuteraano, ekelaka wira ephwanye Makhura, nto owo waari p'ukathi Mutheli aaruuly'awe. Nrowe nuupuwele yeeyo.

⁸ Miyo khenakiireke Billy, mwan'aka, okihimeerya etthu iyo ntoko owo siikihimenryaawe okathi vakhani ovinre. Owo iirale, “Paapa, miyo nkinooleelani etthu yo wira. Miyo nkinthuna woothananihani mwa etthu p'itthu, masi,” khwira, “paapa, etthu p'itthu eniir'anyu, muhelele okathi anyu wothene w'atthu anwereiwa.” Owo khwira, “Nkinatoko owoona atthu anci-ene oowereiwa!” Khwira, “Miyo kookawa ittikitti imiya piili okathi vakhani.” Khwira, “Aakhala atthu anci-ene anwereiwa!” Owo ti voomurikela saana okileela yeeyo.

⁹ Vano nto kihoorwa ohiy'ula ni soolepa kamosa-kamosa sikaani va, ni soohimya kamosa-kamosa mwaha wa olamuliwa onaattamela, ni nisuwelaka wira nikilaanthe va ohiy'ula ni eviruwelo ene ya Muluku ethukumelaka vathi va hiyo, nto vahilekenle enoomana. Ni nisuwelaka wira oviruwa wa Muluku onoolipelela; okathi ene yoowo enrowaaya ohimmwa, enoomalamala, w'atthu imilyawu sene. Ni kisuwelaka eyo mmurimani mwaka, ni kisuwelaka wira ti siiso! Vano nto ninniwoona aretta anci-ene ekakhanaka.

¹⁰ Nto miyo kuupuwela, “Ohiy'ula, anci-ene a awo aKristu.” Ni mukihye koohimeeryeni ila, nyuwo aana a Muluku. Etthu p'itthu muniiraanyu, mwiihuluxe sothene. Mmurumeele Muluku, othana n'uhiyu, ni murim'anyu wothene. Nyuwo, nyuwo pooti woona wira yookhala etthu evonyeiye. Nyuwo pooti woona eyo mweettaka mphironi, nyuwo paahi. . .ni mapuro othene onrowaanyu. Nyuwo munnisuwela, mwaari a erooho; ni koosuwela wira mwa yaawo.

¹¹ Nto miyo kaalavula ni mulopwana mmosa, Munna Stromei. Nkisuwenle sinto Tony ori vaava, wala nnari. Owo, owo aari. . . [Munna mmosa oniira, “Tony Salameh?”—Mol.] Tony Salameh, Salameh, Salameh? Nnari. Kinimuhimya Tony ohikhanle. [Munna mmosa onihimya etthu.] Nnari, kahi Tony yoowo. Ola ti Tony a—a—a oTucson. Nsina nawe ti pani? [Mutthu

mukina oniira, “Stromei.”] Stromei! Koosuwela wira ti Salameh, Stromei, wala etthu siiso. Miyo kinikhala voomalela . . .

¹² Muloooca mwawe, nihiku nlo, mulopwana mmosa aahivolowa, aari oothamaleya, owo aahimya etthu yaakuupuxenrye, okathi miyo . . . okathi wookiserya waary’aka o—oHintiya.

¹³ Weiwo, kinoonaaka wira Apwiya yaahinivaha muttitthi muulupalex a w’atthu nitonko ahu okhalana emaara emosa, waari oBombayimi. Khinaawerya hata ophwanya opuro nnakhala nipuro nimos a wira naahele-vo, ikonto miloko miloko sene ni ikonto sene s’atthu.

¹⁴ Nto okathi vakhani nihinatthi ophiya iwe, yaahikhala epaphelo ya ihapari yaataphuleliwe. Ahe, yaari, Hintiya elapo ya mattaava maili, yaari—yaari epaphelo ya Enkelesi. Nto yiirale, “Ahe, itetere s’elapo sihaana wira simanle, axipalame anoovava ethhikelaka ipa saya ni ipuru saya.”

¹⁵ Mahiku vakhani ehinatthi orwa etetere, yaapwanyunle itekelelo ni itthu. Axipalame akhaani anniiphwanyerya nipuro nootthyawela mmialani, ni oteka ipuru saya; nto oxekuwa wala othana eriyari, okathi nsuwa ninkhalaaya nooviha saana, axinama othene anrurerya makokoro ale a maluku, wira ekhalase mmuuttutthini. Nto mwa mahiku maili, axipalame yaahikhala mmirini, awo khiyaarwa mpuruni mwaya; ni mahiku maili, axinama, ipwittipwitthi ni inyompe, khisaatthuna waattamela oxekuwa, wala opisa mmakokoroni mmwe. Iyo—iyo saahikhala vapuwani ni ophiteeryana mmosa ni mukwaawe, mwaha wa muuttutthi.

¹⁶ Nto naanaanoru, etetere ya elapo, yaattikinnye makokoro ni opwexakasa mampa. Nto, moone, vaakhanle wira axipalame ale yaahikhalasa vale, yaamwiira apweteyanse. Vaakhanle wira inyompe saahikhala vathi vaya, ni ipwittipwitthi, iyo saamwiira sipweteiye. Muluku alopolaka ephattu!

¹⁷ Mahiku vakhani avinre, muloooca mwa Munna Tony, kaamwiiwa mulopwana mmosa mmwe aairale . . . Okathi yiireiye-aya etetere ela wAlaska, owo aammaa iwe weiwo oniianaahu Stony Point, oMexico. Nto owo khwira, “Axipalame khiyaatthuna olya, ni ihopa khisaatthuna olya. Yaahikhala etthu yaavonyeiye. Nto, naanaanoru, etetere y’elapo khupacerya.”

¹⁸ Nto nihiku nimos a, vaairaneieye-aya ele oHintiya, wala nipuro ti nipuro, owo ohimye wira aammiserya-tho. Owo khuupuwela, “Ahe, ti yootikiniha. Ihopa iye sinlya okathi ntoko yoola. Khaavo mawimpi mmaasini, hata nipuro. Maasi t’omaala tu, okathi wooreerela ihopa olya, masi khisaalya. Ni axipalame othene voolimaleleya ari iwe, inaka, sittottaka ihopa iya ni itthu, sothene saamweetakasa okerekhere, sithipeeryanaka emosa ni ekhwaaya. Okathi vakhani, mirawa sa mphareya sa vathi

khupacerya okhuma *siisaale*, etetere y'elapo yaakhumelenle epanthe ekina ya elapo." Moone, ihopa iye saahisuwela wira yaahikhala etthu yahaalonke, wira etthu yaahalela okhumelela. Axipalame ale yaahisuwela etthu emosaru.

¹⁹ Vekeekhai, vakhala wira Muluku onnivaha ehopa ni mwaapalame othokorerya, khivaatempe Owo waavaha Awawe—an'Awē! Hiyo noosuwela wira niri okathi wa woomalelani, ni ehukhumu enoolipelela, tivo nikhale ootiittimiha saana. Mutthyawele wa Muluku ni murim'anyu wothene! "O Kafarnawu, nyuwo munninnuwihwiwa mpakha wirimu, munooyevihwiwa mpakha omooroni," nto olelo owo omphwanyaneya vathi va maasi. Muupuwele paahi, ni nvekele.

²⁰ Vano, ohiy'ula, kinthuna kisome nipuro va mwa Soolempwa, okathi vakhani paahi. Ninrowa waavekelela aretta. Billy ohimye wira ookawa nikuttha na ittikitti sa mavekelo. Ni owo aahikawa sikina nsana, ni nkaaphiyenrye hata emosa wa seiyo nsana ohiyu. Ni kaahikoha, okathi Erooho Yoowaarya jaarwiye-aya...Eyo paahi...Nyuwo khamukhanle ovarihaka Eyo muteko. Eri ntoko evenxeryo yaamukhaani, nyuwo munikhomanyerya eyeettiheryo. Nyuwo t'ale muniiriha Erooho Yoowaarya ovara muteko, kahi miyo. Nyuwo muniira eyo yeenyu. Tivo miyo, nsana ohiyu, kaahiweha hata moolamulani sa mmurimani, wira eyo khiyaalikanenle atthu oratta-ene. Awo khiyaakhala ntoko okuxa eyo. Miyo kooweha eyo, va okathi vakhani, enkhala ntoko siiso, ntoko siiso, okathi waalavul'aka, kiwiixaatheryaka matata aretta, awo annisuwela.

²¹ Naahaana osuwela wira mwa hiyo noovaheriwa, hiyo nimmwaamini Yesu Kristu ni niyariwe ni Erooho Awe ni nisarihiwe ni owerya iwo onvaha ekumi, owerya iwe ori mwa nyuwo. Naaixaatheryanaka matata, mmosa n'akina, ntoko awiixutti siiraaya ni moovirani w'okathi, Ela vekeekhai yaanaavoniha aretta, yaanaahihimuxa alipa-ookhwa, Ela yaanooniherya soowoona, ohimya s'ohoolo. Nto Erooho emosaru yeeyo yaakhala varyari v'arummwa opacerya enkhala mukereja olelo, evaraka itthu imosaru seiyo. Nto nimalakaru osuwela eyo! Moone, hata wira envara sayi muteko, muhaana osuwela yeeyo ni waamini yeeyo. Khenrowa oreerela hat'etthu, mpakha nyuwo mwaamini. Masi okathi nyuwo munaamini-anyu, mikattyamiho sanyu soomala. Eyo ekeekhai.

²² Vano nrowe nikhunle mwa Soolempwa. Miyo kaakilaanthe vale, okathi vakhani ovinre, khulepa-tho Soolempwa kamosa-kamosa, wira kirukunxe mwaha aka w'ohiyu. Ni kinthuna kisome etthu ya Masu a Muluku, Muliivuruni mwa Luka Oowaarya, kapiitulu 8, opacerya versiikulu 40. Nwiriyanē vano, kinrowa osoma voottaiva.

Vano vaahiraneya, wira, vahokolonwaawe Yesu, atthu yaahimwaakhela ni otteeliwa murima: okhala wira atthu othene yaanimulipelela.

Owo khiwaarowa okhala mukhalelo wooreera wa nikhuru ohiy'ula?

Nto, okathi yoowo, aahiphiya mulopwana mmosa aaitthaniwa Xairu, aari mukhulupale a mpaani moothukumana: nto owo aahikokhora munawoni mwa Yesu, anvekelaka wira arowe owannyawe:

Okhala wira aarina mwaana mmosa-ene mwamuthiyana, aarina iyaakha muloko ni piili, aahanle okhwa. Masi okathi waarowaawe muttitthi w'atthu waanimphunya.

Ni muthiyana mmosa aavuwa ephome iyaakha muloko ni piili, aamalihale muhakhu awe wothene owaaveryaka akulukhana, nto khaavo aawenrye onvonih,

Aahaattamela ottuli wawe, khukwannya mukarekhere mwa nlaya nawe: nto naanaanoru ovuwa wawe ephome waahixeya.

Nto Yesu aahiira, Taani okikwannyale? Okathi atthu othene yaarunne-aya, Petru n'akina yaari ni yoowo khwira, Mwixuttithi, muttitthi ola onnoophunyani ni wookakhani, nto nyuwo munikoha wira, Taani okikwannyale?

... Yesu aahihimya wira, Ookhala okikwannyale: maana kinnoona wira owerya wookhuma mwa miyo.

Nto muthiyana owo voonale-awe wira khaawerya wiipitha, aahirwa athukumelaka, khukokhora vakhiviru vawe, vano aahihimuleela owo ohoolo w'atthu othene mwaha waamukwannyenrye-awe, ni enamuna saavonihwaawe naanaanoru.

Vano owo aahimuleela wira, Mwan'aka, mutteeliweke murima: waamini wanyu ohoovonihani; murooke ni murettele.

Nto nlelo owo...alavulaka, aahiphiya mutthu a vate va mukhulupale a mpaani moothukumana, amwiirelaka, Mwan'inyu ohookhwa; muhimuukhuletho Mwixuttithi.

Masi Yesu vaiwalyaawe, owo aahimwaakhula, airaka, Muhoove: mwaamini paahi, owo onookhala mukumi.

Nto owo vavolonwaawe mpaani, owo khaamutthunihenrye hata mutthu okela, ahikhanle Petru, ... Yakopo, ni Yohani, vamosa ni atiithi awe ni ame awe mwali owo.

Nto atthu othene yaaninla, . . . emukhupanyeryaka: nto owo aahiwiirela wira, Muhinle; owo khokhwiye, masi onoorupa.

Nto awo yaanimutheya, esuwelaka wira aahikhwa.

Masi owo aahaakumiherya atthu othene ota, khunvarela ntata, khumwiihana mwali uwo, airaka, Mwali, nvinye.

Nto erooho awe yaahihokolowa, owo aahihihimuwa khuvenya naanaanoru: nto owo aahiruma wira avahiwe eyoolya.

Vano axitiithi awe yaahitikinihiwa: masi owo aahaaruma wira ehimulele mutthu etthu yaakhumelenle.

²³ Vano nivekele. Tithi Oophentiwa a Wirimu, naasomaka Masu ala, hiyo noosuwela wira eyo ekeekhahi. Ela yaahiiraneya. Kehiyo ethale nisomme-ahu khino ya epaphelo ya ihapari wala eliivuru y'ewokelo emosa masi ela enrwa okhuma Muliivuruni ninsuwelaahu okhala Masu a Muluku. Ninnaamini wira yaahiiraneya. Hiyo ninnaamini wira Yesu ula aairale etthu ila yoovuwihya, imaara piili va, ya muthiyana aavuuva ephome, ni mwaana aakhwiye, hiyo ninnaamini wira Owo Mwaana a Muluku, yoowo Muluku omuhihimunxe-awe mw'alipa-ookhwa ni khunooniherya Yoowo hiyo, ohiy'ula, mwa omutthu wa Erooho Yoowaarya.

²⁴ Ni hiyo ninnaamini wira Owo ori vaava ni hiyo ohiy'ula. Ni naaminiki wira Owo mmosaru nsana, olelo, ni mahiku othene, ikhupanyerelo Sawe sinnaaphiyerya atthu. Ni okathi atthu ammurowelaaya Yoowo, iphwanyeryo imosaru saavahiwe nihiku nle sinoovahiwa nihiku nla. Munivahe-tho, Tithi, wira hiyo nikhalane mureeriho musya. Ntoko Munna Shakarian sivekenlyaawe vaxariya-vo, okathi vakhani ovinre, khuvekela muthukumano wira waamini, hiyo ninnivekela-tho mwa Nsina na Yesu Kristu. Amen.

²⁵ Kintthuna kilavule okathi vakhani paahi, nto onrowa okhala okathi vakhani paahi, okhala wira kintthuna kaaruuhe atthu awo ni ittikitti sa mavekelo osulu nno kaavekelele. Ni ohiya etthu p'itthu ekina masi waavekelela aretta paahi. Masi nihinatthi waavekelela aretta, nihaana waakeliha atthu mukhalelo yoowo. Owo ti mukhalelo kweekwe onruuha iphwanyeryo. Owo ti mukhalelo munikhalanaanyu wa Muluku.

²⁶ Va ori muthiyana mmosa aakwanyale nlaya Nawe, owo aahivonihwa, aavuuva ephome. Natoropa mmosa aahimusenela wiitho Wawe khunwariha ekhara ya miiwa mmuruni Mwawe, khuhoona hata owerya.

²⁷ Onkhala waattamela wanyu. Mwiirelo t'onthuneya. Nto ti yeeyo ekhanle ohiy'ula, mpatthani oophentiwa, onthuneya

mwiirelo. Hiyo nri, ni ninnaamini wira niri, Ohoolo wa Yesu Kristu, masi owo ti mwiirelo anyu onruuha iphwanyeryo. Ikaruma siri vaava, siiso-tho eyeetiheryo. Mwaweryaru paahi opacerya, Muluku onimwiira ele enihala.

²⁸ Vano, mwah'ola miyo ontthunaaka olavula, okathi vakhani, ti: *Wooniherya Masu Awe*. Vano eyo etthu yuulupale, wupuwelela yeeyo: *Wooniherya Masu Awe*.

²⁹ Vano Muluku t'owerya wooniherya Masu Awe, ohiy'ula, ntoko Owo kweekwe sitonko awe wooniherya. Ni Bibilia oohimya-tho wira, "Nweheke itthu sothene. Muthanleke ele eri yooreera."

³⁰ Vano nyuwo muhiwa, voohihoverya, muhiwa nlikanyiho na khalayi, "Mooniherye, miyo kinimwaamini." Masi eyo kheneemererihwa. Imaara sinci-ene miyo kihoona itthu wooniheriwa, saari sowooniheriwa voomalela hata ni siyensiya, nnakhala vo atthu khayaamini iyo hata vakhani.

³¹ Miyo kaalavula ni mulopwana mmosa, nno woohikhala khalayi. Hiyo naalavula mwaha w'ovoniha wa Muluku. Owo khwira, "Miyo nkaarowa waamini iyo. Nkincala exeeni yaarowa okhumelela, mooniheryo xeeni mwaakhanlyaanyu okumiheryaka, nnakhala vo miyo nkinaamini." Ahe, vekeekhai, hata wira mwaarowa omwiirela exeeni mulopwan'owo, owo—owo oopweteya. Owo khonwerya waamini. Khiivo hat'etthu mwa yoowo, wira aamini.

³² Miyo kaahikhalana pahi mu—musuwelelo mmosa mwaamukhaani va, wa esumana yoophiyaka emosa evinre, ntoko nyuwo othene sinsuwel'anyu wira miyo—miyo kinnixaya. Nto vahokolonwe-aka omuthukumanoni waka, miyo kaaxaya amwatto. Nto vathaamenlyaaka w'Arizona, ti yooreera, miyo okisivela waaxaya axinama aalupale, ni okisivela okhumela eriyari ya ephattu ni oweha.

³³ Vano, miyo nkihiyo namwiiva. Miyo kinooxaya paahi. Tivo, miyo—miyo khonkisivela ohonona muhavo, miyo—miyo nkinoona wira ti yooreera. Kinoona wira etampi tu wiiva muhavo, mwaahirumeeleke ni orowa orumeelela etthu, ntoko saarowaaya okhala wiiva etthu ekina. Miyo kinnaamini wira ti yoovonyeya. Hiyo khinaakhanle wiiraka yeeyo. Muluku onivahenrye eyoolya ni itthunelo, ni khinaakhanle ohononaka. Masi vano ele malamulo anihimyaaya wira pooti okuxa, vaareera. Masi muhohononeke.

³⁴ Nto miyo iwe, ehuhu yoovira wa itthu sothene sikina. Amwatto anniiva inyompe sinci-ene. Ni miyo kinnaasuwela alimi anci-ene mulaponi. Ni okathi wothene awo ankhalaaya mwaamunama oniiviwa, vano, awo annikihana, okathi mwatto onkelaawe eriyari ya ipwittipwitthi. Nto mpatthani aka mmosa, ohiyu umosa, saahimpweteya itoolare soophiyaka ikonto tthaaru ni imiya thanu, ohiyu umosa, mwaha wa mwatto mmosa

owiiva amwaapwittipwitthi paahi. Owo aarookela mmwe, nto, vekeekhai, amwatto akina anoorowa oliva mwaha w'etampi awe. Nto siiso kaahimwiiva mwatto owo, ni siiso aari mwatto muulupale saana, a imeeturu piili ni isentiimeturu miloko mithanu ni xexe orakama wawe, aalemela ntoko ikhiilu emiya ni emosa ni etthu, tivo aari—aari mwatto muulupale saana.

³⁵ Vano nto miyo khurowa okhuma muttethe wa wArizona, mpakha Utah, wira kaxaye. Nto siiso khuleeliwa wira yaahikhala atthu iwe, wira mulopwana mmosa miyo kaarowakaaka oxaya ni yoowo, aari namaxaya ni miraakho a kuveerunu, “Nto, koovara metto, muhimiye hat'etthu ya etiini, vakhiviru va yoowo.” Khwira, “Owo vekeekhai aari mutthu oowali.”

Nto miyo khwira, ahe, miyo khimuleela mulopwana kaarowakaaka ni yoowo, miyo khwira, “Nkinrowa ohimya.”

³⁶ Owo khwira, “Muhiire 'mulaleyi.' Mwaira vale, khimunrowa owerya oxaya. Owo khonrowa wookuxani.” Khwira, “Miyo kooxaya ni yoowo mahiku mararu, ni koorupa vamosa ni yoowo khula ohiyu, kihoolya ni yoowo mahiku othene, nto owo khonatoko hata ohimya wira, 'Mooxeleliwa. Ehaali anyu? Munnitthuna etthu y'olya? Murapihe mihasa.' Hat'etthu!” Khwira, “Vano muhimiye hat'etthu ya yeeyo.”

Miyo khwira, “Nkinrowa ohimya nuulumo nimosa.” Vano miyo nkaamuhimenrye wira nkaarowa ovekela, masi kaakhala kimuleelaka paahi wira miyo . . . Nto miyo kaamurowa ovekela.

³⁷ Vano vaphiyaly'ahu iwe, mulopwan'owo aari a mukhalelo wa murima wootakhala, ni miyo nkoona wira aanaamini etthu. Ni owo aammalaru opweteiwa mwan'awe ohiyu vakhani eyo ehinatthi, mwaana aayariwe ookhwa-ene. Vano, hiyo naahirowa oxaya. Nto nihiku na nenli, mulopwana kaaxayaakano, aahimuleela, khwira wira kaaniwerya oxaya mapuro othene mulaponi. Vano okathi mulipa-ooxaya mukina, aari ni miyo, aakhumme-awe, hiyo naari vasulu saana va ikhato; vaavo naamanlyaahu omwiikara mwatto, mpakha omukeliha muhina mwa miyala, nto owo khutthyawa. Nto siiso hiyo naakilaanthe vaavo nimulipelelaka mwalapwa otthika. Nto mulopwan'ola khukiirela, owo khwira, “Mulipa-ooxaya mukina, mpatthani anyu, onikileela wira nyuwo munniwerya oxaya mapuro othene. Nyuwo khamureerane musurukhu?” Khwira, “Kinoona wira owo kuhiyo mwah'aka.”

Nto miyo khwira, “Nnari,” miyo khwira, “kahi wira kirina musurukhu munci-ene.” Miyo khwira, “Miyo—miyo kinookhaliheriwa.”

Nto owo khwira, “Oh, koosuwela.” Owo khwira, “Ahe, kinoona wira kuhiyo mwah'aka tho, masi,” khwira, “munvara muteko ni ekupaniya enookhaliheryani?”

Owo aapurula eyo okhuma wa miyo. Miyo kaahihimya wira nkaarowa ohimya, moone. Vano miyo khwira, ayo, miyo khwira, “Nnari, mulopwana. Miyo ka mulaleyi, misiyonaariyu.”

Owo khwira, “Exeeni?”

Miyo khwira, “Misiyonaariyu.” Nto owo khukhala akiwehaka paahi minuutu vakhani.

Miyo khwira, “Mookhalana nrromelo wa Ekumi y’ohoolo? Nrromelo anyu t’uvi?”

Owo khwira, “Miyo ka Jack Mormon.”

Nto miyo khwira, “Exeeni?”

Owo khwira, “Jack Mormon.”

Miyo khwira, “Muthinto xeeni uwo?”

Khwira, “Ole onkwakwaruwa mwaano ni onwurya ekafe, ni onaavura asikaro.”

Miyo khwira, “Ahe, ohimya wa xariya ti woorerela wa munepa.”

³⁸ Vano nto owo khwira—owo khwira, “Kintthuna kookoheni etthu emosa.” Owo khwira, “Kinileeliwa wira ekereja Mormon ti ekereja emosa y’ekeekhai ekhanle.” Owo khwira, “Nyuwu munnaamini yeeyo?”

³⁹ Miyo khwira, “Yaahimmwaka ekereja, kinoona wira ti yooreera ntoko khula emosa wa seiyo. Miyo kinsuwela Ekeekhai emosa paahi, ni eyo ti Yesu Kristu.” Miyo khwira, “Miyo koosuwela wira Owo Ekeekhaii.”

⁴⁰ “Ahe,” owo khwira, “Kaahikhalana mwaana aayariwe, ookhwa-ene ohiyu uwo.” Owo khwira, “Miyo kileeliwe wira mwaan’ola, okhala wira oyariwe ookhwa-ene, Muluku khonaiseleke ephumu y’ekumi mwa yoowo, tivo nkikhalakhala-tho kimoona.” Owo khwira, “Munuupuwela exeeni wa yeeyo?”

⁴¹ “Ahe,” miyo khwira, “Khamunrowa omoona ntoko Jack Mormon, vekeekhai khamunrowa. Eyo ekeekhaii, khamunrowa omoona mwaakhalakaru Jack Mormon.” Nto owo khwira . . . Ahe, owo aarookipaca, tivo miyo khutthikela ompaca vakhani, moone. Naahikhalana—kaahikhalana okathi wo otthikela ompaca. Tivo owo khwira—owo khwira . . . Miyo khwira, “Exeeni yiiraneiyeyo?”

Owo khwira, “Oh, nkisuwenle.” Nto owo khwira, “Ahe, munoona sayi?”

Miyo khwira, “Miyo kinnaasuwela anci-ene ooreera . . .”

⁴² Miyo nkaasuwela wira aari Mormon. Ni nkaareere . . . Koosuwela, okhala wira oUtah, alakela waaryaaya, masi miyo . . . okhala wira atthu anci-ene iwe aMoromon, muxerere mwa Salt Lake City. Ela khiwaari oSalt Lake City, nnya. Tivo

miyo khuupuwela, “Ahe, kihaana apatthani kamosa-kamosa aMormon ooreera murima, yaari muliinyani mwa mavekelo, atthu ooreera murima.”

⁴³ Nto miyo khwira, “Kihaasuwela atthu kamosa-kamosa ooreera murima saana akhanle—akhanle aMormon.” Nto owo khwira, ahe, owo khwira... Miyo khwira, “Nkinsuwela mwixuttiho aya wa yeeyo, ni nkaarowa otthuna ohimya etthu yoovirikana ni wiixuttiha waya, okhala wira ti yeeyo mukhanle-anyu, ni miyo kinnittitimiha eyo vancipale.” Nto miyo khwira, “Ahe, ni nyuwo munnaamini yeeyo?”

Owo khwira, “Ayo, mulopwana, kinnaamini. Masi,” khwira, “Miyo nkinikhala voophiyerya yeeyo.”

⁴⁴ Miyo khwira, “Ahe, kinnaamini wira Bibilia onniixuttiha wira Muluku aahimusuwela mwaan’owo, iyaakha imilyawu sene sivinre, ohinatthi opattuxiwa olumwenku.” Miyo khwira, “Muluku aahimuleela Yeremiya, ‘Muhinatthi orupaliwa mmirimani mw’ame anyu, muhinatthi okhuma mmirimani, miyo kihoosuwelani, khooreerihani, khookhalihani profeta a maloko.” Miyo khwira, “Ti siiso Owo aasuwenle-awe wa yoowo, moone.”

Owo khwira, “Ahe,” owo khwira, “kooxukhuru.”

⁴⁵ Owo khupacerya weetta akhuruwelaka vantumuxani. Vano nto owo khikumana ni mmiravo ola, nto owo khwira, “Xeeni ohikihimeerya wira mutthu ule aari mulaleyi?” Nto siiso hiyo... Owo khulavula ni yoowo vakhani khupacerya omuleela sa mithukumano.

⁴⁶ Vano, aMormon annaamini s’eprofeta. Miyo nki...siiso ohikhanle hata mmosa va, masi awo—masi awo annaamini s’e—s’eprofeta. Masi, vano, khino miyo kinlavula ota wa oxikola, masi miyo...Ayo. Ayo. Masi, mwa khula enamuna, awo annaamini.

Nto owo khwira, owo khukitthikela miyo, khwira, “Kinoonaaka nyuwo mwa profeta.”

Miyo khwira, “Nnari, mulopwana.” Miyo khwira, “Miyo... Apwiya annikoonihaka ithu kamosa-kamosa sinrowa okhumelela.”

⁴⁷ Vano owo khurowa, naanaanoru, khwira, “Nrowe nivolowe.” Vano owo khukela mukaaroni mwawe, khurowa mpakha mu...muttethe awe mwaamukhaani weiwo aakhalaawewo. Okathi vakhani, aahilakaseya. Hiyo naatthokiha alapwa, wira nikhume-tho naxaye nuumala olya y’othana. Nto waatthokihale-ahu, vano, owo khurowa mukaaroni.

⁴⁸ Okathi vakhani, mmiravo mmosa oophwaneliwa khutthika, oophiyaka iyaakha muloko ni thanu na piili, mulopwana mmosa muKristu ookhala ntoko santu. Owo khwira, “Ola ti muhima

aka.” Khwira, “Owo kahiyo Jack Mormon. Owo ti Mormon eekeekhai.”

Miyo khwira, “Ehaali anyu, mwan’aka?”

Nto owo khwira, “Kinnisuwela wira, wa ele muulupale aka okihimenryaawe, wira nyuwo mwa profeta.”

Miyo khwira, “Nnari, mulopwana.” Miyo khwira, “Kahi wira miyo ka profeta.” Miyo khwira, “Apwiya annikoonihaka itthu sinrowa okhumelela.”

⁴⁹ Owo khwira, “Kooommwa exasawu vamoone ni naanaano va, kihaana okhala vameesa va operasawu.” Owo khwira, “Masi muulupale aka ookileela ela. Nto miyo khwira, ‘Vaari siiso, miyo nkimpavela operasawu.’” Owo khukiweha olukama wene mmaithoni, oweha wa xariya, wa nneema, w’eekeekhai, khwira, “Mukiixaatherye matata. Itthu iya sakhala ti siiso, miyo nkimpavela operasawu.” Owo khurowa owaani mukumi.

⁵⁰ Munn’ola, mpatthani aka muKristu, aaxaya ni miyo, a oPhoenix. Owo khukiirela, owo khwira... Amosa-amosa wa amiravo ala akilaanthanse vaava naanaano va. Mmosa aya koosuwela wira ori vaava. Hiyo khurowa owaani. Owo khwira, “Munna Branham, Apwiya yaawoonihenryeni yoowoona ni wootthuniheryani waaleela aMormon awo paahi etthu enrowa okhumelela, eyo enoophiyerya, okhala wira awo anlipelela yeeyo.”

⁵¹ Siiso, miyo khuvekela ni khuvekela. Nto kittharaka ephiro otthikela owaani, miyo kaamoora, Esekunta yoottharelana, Ettiminku, ntoko iwoora muloko, kaarimweemela musaala, numala okokhorela voosis’ule, ni kaaweha vate.

⁵² Nto kaahooni mithuko siphanimaka, wala muthinto mmosa wa waarya ophanimaka. Nto kaahimoona mwatto aari mmwirini, ni—ni aari ooyevaxa wira kimoopole. Miyo nkaatthuna eyo. Nto aahikhala mutthu mukina aamoopenle, nto, vairalyaawe, aamoopenle ni kapwitthi muulupalexa. Khimutapatha mwatto owo. Kiyaaakisisvenle e—e—enamuna yiiriwaaya eyo.

⁵³ Vaphiyalyaaka oPhoenix, kimuleela Munna Dawson yeeyo, ni Munna Mosley. Koosuwela wira owo ori vaava. Miyo kaahimoona nihiku nlo, nipuro nlo va. Vano owo aarowa ni miyo, owo ni amwaar’awe. Nto miyo khwira, “Nwehe ni moone, eyo ti SIISO ANIHIMYA T’APWIYA. Enrowa wiiraneya siiso.”

⁵⁴ Ohiyu munci-ene naahilipelela, ohiyu mixexe wala mithanu, naahixaya, ahiiso mahiku. Ti voorikarika mwatto otthyawela mmwirini ohiyu. Yaahiraneya okhala, kirwaaka owaani, awo yaarimwaataphula alapwa, namaxaya ola, mmiravo ola Mormon. Nto mwa—mwatto khutthara mphito, ahiiso mwalapwa khutthara mphito wa mwatto, kiireke, nto khumwiikara khunthyaweliha mmwirini. Nto ewoora

yanamuloko ohiyu awo khurwa, khunikumiha voolilini. Hiyo khurowa mpakha weiwe, nto vale aari mwatto yoole mmwirini. Muthuko waaryaka, Munna Mosley khumoopela ni kapwitthi oowunnuwa mulithi ntoko miloko mixexe ni xexe, aahala omukawanya mwatto ipantte piili. Nto yaari vale, siiso ntoko saahimmw'aya.

Mmeeloni mwaya, kaahikumana ni mulipa oosuka etakhwa mukhulupale a estaatu, Jack Mormon mukina. Khwaakuxa amiravo ale vamosa, khuweettiherya otthikela wa Kristu.

Miyo kinimooleelani, wira Owo mmosaru nsana, olelo, ni mahiku othene. Muluku onnooniherya wira Masu Awe ti siiso.

Nyuwo moowiiwa atthu wira, "Woono ti waamini." Eyo kehiyo ekeekhai voomalela. Atthu anci-ene annoona ni nnakhala vo khanaamini.

⁵⁵ Mahiku Yesu aaryaawe elapo ya vathi, awo yahaamusuwelenle-ni Owo, wira Owo aari Masu a Muluku owooniheriwa? Xeeni atthu yahaasuwenle-aya wira Moise aahihimya, "Apwiya Muluku anyu anoomuthanla profeta onlikana ni miyo"? Ni Owo aahimaliherya khula Masu Bibilia aalavunly'awe wira Owo aamwiira, masi awo khiyaamini.

⁵⁶ Masi Muluku, mwa khula okathi, ohooniherya Masu Awe okhala eekeekhai. Owo kweekwe onnooniherya Masu Awe. Vano annihimya imaara sikina, wira, "Woono ti waamini." Kahi siiso. Masi hiyo noosuwela wira Muluku onnikelela ohoolo ooniheryaka Masu Awe mwa khula okathi.

⁵⁷ Hiyo noosuwela wira Owo aahimooniherya Atamu ni Hawa, wira okathi Owo iiralyaawe, "Nihiku ninrow'anyu olya, nihiku nenlo vekeekhai munookhwa." Nihaana okupali iyo, eyo ekeekhaii. Hiyo ninnaamini iyo, okhala wira Owo oonooniherya hiyo, ni noosuwela wira ekeekhaii.

⁵⁸ Vano ninrowa okuxa mapuro kamosa-kamosa paahi yaawo Muluku oonihenryaawe Masu Awe. Nrowe nikuxe, mwa nlikanyiho, mahiku a—a Nowe. Muluku aahilavula ni Nowe mutthaka waari vekeekhai woohikhala wa siyensiya ni woohaamineya. Khaavo aarowa owerya waamini. Khiyaatonko orupa epula elapo ya vathi. Yoohikhala ya siyensiya!

⁵⁹ Khino awo yaari a okathi wa siyensiya muulupalexa ovikana siryaahu vano, okhala wira awo yaanitekas ipiraamite ni itthonto, ni sikina, mahiku ale, hiyo nihinweryaahu oteka vano. Awo yaahilimalela owerya, muthinto mmosa wa ikuru sa ikaruma, khino s'atomu, khino wala etthu siiso, awo yaaweryaaya ottukhula maluku ale maalupale, hiyo nahaarowaahu owerya wira olelo. Masi awo yaahipaka itthu suulupale sa siyensiya. Awo yaahikalana etthu yaaweryaaya omareela erutthu, wira ekhaleke ntoko y'ephattu mwa miyaakha imiya sene. Hiyo woonipweteya oratta iwo.

60 Yesu ohimnye wira, “Ntoko saary’aya mahiku a Nowe, siiso-tho vanimwiiraneya orwa wa Mwaana a mutthu.” Ni noosuwela wira nihanle okela okathi mukina muulupale wa siyensiya.

61 Nto vano mutthaka Nowe aarin’awe waari woovirikana saana ni waamini wa nihiku nle, mukereja, ni waari-tho woovirikana saana ni othokosa wa siyensiya. Masi Muluku aahooniherya Masu Awe okhala ekeekhai. Muluku aahooniherya wira yaahimmyawe profeta ole yaari ekeekhai.

62 Nave-tho ninoomukuxa mukina okathi vakhani paahi. Abrahamu aari profeta mukina a Apwiya, yaamurweenle Masu. Nto khimuleela, okathi waarinaawe miyaakha miloko mithanu na miili ni mithanu, ni Saara aarina miyaakha miloko mithanu na mosa ni mithanu, wira aarowa okhalana mwaana ni Saara. Vano, eyo yaari evirikanelo ni etthu wa mulipa-oohaamini. Mwaamuwerya otthokelela, olelo, etthu iyo yiiraneyaka hata nihiku nenla, ni soopaka sahu sothene sa siyensiya, ni aana ala othene a mpompe anihimmwa, ni sikina? Masi muthiyan’ola mutokweene, vano a miyaakha miloko mithanu na mosa ni mithanu, ni mulopwana mmosa a miyaakha miloko mithanu na miili ni mithanu, masi Masu a Apwiya yaahimurweela Abrahamu khimuleela wira ela yaamurowa wiiraneya. Ni Abrahamu aahimwaamini Muluku. Vano, hata wira Muluku aalavunle sayi, ni moota xeeni yaaryaaya ekeekhai, Abrahamu aahaana waamini ele Muluku aahimmyaawe, wira ekhale siiso. Vano nkawehani moota mulopwan’owo ehereriwaawe, ni onamoonawe, wira owo vekeekhai aahaamini.

63 Mulopwana ene yoowo aahimyaale nuulumo nlo, wira aahimwaamini Muluku, owo mutthu ntoko nyuwo siryaanyu, mukilaanthe va ohiy’ula. Hiyo nlelo ninnimwaamini Muluku. Nihaana waamini wira Masu Awe Ekeekhai. Ni Owo onimooniherya, wira Eyo Ekeekhai, hiyo naaminiru paahi.

64 Vano nkawehani mukhottiheryo Abrahamu aarin’awe. Etthu yoopacerya waari munnuwelo awe, miyaakha miloko mithanu na miili ni mithanu, ni Saara orineene miloko mithanu na mosa ni mithanu. Owo aahivira moorukunuwani wa ekumi, ohikhala mmweerini. Voohihoverya wira yaahihiya, miyaakha sinci-ene khalayi. Owo aahikhala ni yoowo ntoko mwaar’awe. Aari murokor’awe nuusu, alakela aamukunxe okathi waaryaawe mwaaruusi voomwali awe, nto khimuthela. Ni owo khaakhalanne hata aana. Owo khaayara mara. Nto vano ninniphwanya wira, wira aire yeela, owo aahaana wiivalaanya n’atthu othene yahaamini, wira aphiyererihe eyo wiiraneya.

65 Nkinihimya wira nyuwo muhaana wiivalaaniha n’atthu. Masi muhaana wiivalaaniha ni othala mwaano wothene wo ohaamini, mukhale ottaiwene wa yeeyo. Atthu yaairaka wira, “Ah, itthu iyo khasiniiraneya! Nlo nikhuru n’atthu oovahuwa!

Khiivo etthu ene ntoko eyo eniiraneya,” mutthuke maaru anyu paahi mukhume. Muhicale eyo.

⁶⁶ Bibilia ohimnye wira “Abrahamu khaamuhovenrye natiri a Muluku, mwaha wo ohaamini; masi aahiilipiherya, amuttotopelaka Muluku.” Nsina nawe naahirukunxiwa okhuma Abramu khukhala Abrahamu, orukunxiwa wa nsina naahikhaliha nsina nawe, “tiithi a maloko.” Mwaamuwerya omutthokelela mulopwana akhalaka n’amwaar’awe, oophentiwa awe, owo aakhanlyaaawe ni yoowo vano miyaakha iya sothene, nto vano nipuro nimosa mwa miyaakha miloko mithanu na miraru, ni amwaar’awe a miyaakha miloko mithanu na miili, nakhala vo ehirinasa hata mwaana wala nrromelo wa mwaana, nakhala vo aanihimya wira aari “tiithi a maloko.” Mwaamuwerya otthokelela wuulumela wa mpatthani awe a makhalelo airaka, “Tiithi a maloko, vano aana akavi murin’anyu okathi ula?” Ni wuulumeliwa wothene owo waarinaawe ovira-mo!

⁶⁷ Masi Abrahamu khaahovenrye hata nipuro, mwaha wo oohaamini. Owo aahaamini wira Muluku aaniwerya opaka itthu iye Owo aalahenrye-awe, wira Muluku aamurowa wooniherya Masu Awe, hata wira okathi xeeni waarowa ovira. Masi ohiya okhala ootteetheya khula okathi, ntoko hiyo silimalenlyaaahu wira, owo aahikhala a ikuru okathi wothene. “Vakhala wira khayiiraneie olelo, meelo onookhala mwiiriirya muulupale, okhala wira ohuuluvala-tho nihiku nimosa.” Owo aari Muluku, owo aari Muluku mwa Abrahamu, maana owo aanisuwela wira Muluku aanooniherya wira Masu Awe othene yaari siiso.

Aana Awe yakuxaru paahi Masu Awe, wira Owo awerye wooniherya Eyo mwa nyuwo! Eyo t’inamuna emosa paahi Owo okhanlyaaawe wooniheryaka Masu Awe.

Owo khoniwooniherya Awo alipa-oohaamini. Awo khanweryaneya wooniherya; awo t’ohaamini. Masi, Awo kahi w’alipa-oohaamini. Kahiyo a alipa-oohaamini.

⁶⁸ Ti wa ole onaamini. Ni vakhala wira Owo onoowerya omphwanya mutthu onrowa waamini Masu Awe, Owo onimooniherya Masu Awe mwa nyuwo. Ni imaara sikina iretta n’itthu sinninikhumelela siiso, wira Muluku aisooniherye Mmansawe.

Nyuwo munnimuupuwela mulopwana ahoona Yesu aamphwanyalyaaawe? Awo yiirale, “T’ani otthenke, owo wala atithi awe, ame awe?”

⁶⁹ Owo khwira, “Mwah’ola, hata mmosa, masi wira miteko sa Muluku sisuwelihiwe.” Moone, eyo yaahimukhumelela mmiravo wira Yesu avuwihwiwe. Imaara sikina eretta kuhiyo otakhaliwa, eyo eparakha, wira hiyo niwerye wookola waamini wahu mpakha vale ni wiihana itthu iyo sihikhanle, ntoko saakhanle.

Muluku ohimnye siiso, ni Owo onimooniherya wira ti siiso nyuwo mwaahivololeru okathi wo wehereriwa.

⁷⁰ Owo aahiwerya omwehererya Yobi, okathi mmosa, wira owo khaarowa omutakhalihwa Owo ohoolo Wawe. Nkawehani wehereriwa Yobi aavinryaawe-mo. Masi munanttereni mwene mwa okhwa, owo nlelo khwira, “Apwiya ti yaakivanhe, Apwiya t’akunxe, nittotopeliwe Nsina n’Apwiya!” Owo vekeekhai aanaamini. Muluku aahooniherya Masu Awe wa Yobi. Owo aahooniherya wa Abrahamu. Owo aahooniherya wira ti siiso.

⁷¹ Nave-tho Owo aahooniherya ni Moise. Ni okathi Moise, mukacamiho waaryaaya woonvirikanyaxa owo, Moise aahikhalana mmuupuweloni, wira khino, wira akhale nvuluxa, wira amey’awe alakela yaahimuhimeerya wira owo aayariwe mwaana ooreera. Awo—awo yaari mukhapeleli awe yaamunnuwihale mpaani mwa Farawo, voohihoverya wira yaahimuleela, “Mwan’aka, hiyo ninnivekelaka wira nivuluxiwe, ni ninnaamini wira nyuwo mwa mwaana yoowo Muluku onrowaawe omurumeela wira avuluxe.” Vano nto okathi owo. . .

⁷² Moone, owo aahinnuwa ni aari wira okhale mwa—mwaana a mwaana muthiyana a Farawo, nto ninnoona wira owo aari wira okhale mulipa-oohiyeriwa ehice. Vano, vekeekhai eyo yaari mmuupuweloni mwaya nto, wira owo aarowa okhala Farawo aattharelana, “Nto ti siiso owo aarowaawe owoopola athu, mwaha wo okhala Farawo oottharelana.” Masi Muluku aahikhalana e. . . Vaakhanleru siiso, weeso owo aamwiira eyo ni ekaruma, ni e—e—eyiirelo ya ipoliitika. Masi Muluku khonvara muteko siiso okathi wothene.

⁷³ Muluku ookhalana inamuna Sawe so ovara muteko, ni Owo aahimnye wira “aamwaakumiha.” Owo aahimuleela Abrahamu, “Nuuvira iyaakha imiya xexe,” Owo aamurowa “waakumiha, ni ntata na ikuru,” Owo aamurowa “wooniherya ithoonyeryo ni mitikiniho.” Tivo owo khaakhanle wiiraka siiso, tivo Abra- . . . Hiyo ninnoona wira Abrahamu aahimwaamini Muluku, nto va ori Moise vano omwaaminiki Muluku.

⁷⁴ Ni Moise aawehaka vacanelani emosaru Farawo aawehakaawe, owo aahiwoona athu yaawo amosaru. Farawo aawehakaawe, ntoko, “Athu ootakhalihwa, athu yahaarina hat’etthu woohikhala nikhuru wa onamathipelela, mwaha wa Muluku, ni Muluku mmosa a mothakoni nipuro nlo awo yaahusuwelaaya etthu ya yoowo; nripu nimosa nohooneya awo yaavekelaaya, mwa nenlo yahaakhanle hata etthu. Awo yaari nikhuru n’anamathipelela. Ni yaari nikhuru na ipottha. Nto Muluku aya waahiya awo okhala ipottha, aanooniherya wira Owo khaari Muluku.”

⁷⁵ Nto varyari vene va etthu yothene, Owo aanvenxa mutthu ene. Muluku oniira itthu mwa inamuna s’omeekha, vathi vaya. Kahi teyooloku, kahi mwiixuttihi, hata namukuttho,

kahi mmosa w'atthu aya ooreera murima; masi mutthu pure paahi, ooyareliwa muteko. Nto Muluku khumwiihana wira okhale profeta Awe, khimuruma weiwo. Ni hat'etthu mmatatani mwawe woohikhala ttootto ookhurupuwa, wira owanane muttitthi w'anakhotto, makhuru ookhalana ikaruma yaaxinttale olumwenku wothene. Masi ni ttootto yoowo mmatatani mwawe, ntoko Muluku saamuhimenryaawe wira anvarele ttootto ole mmatatani mwawe ni owo aamurowa onvuluxa Isarayeli, vano owo aahirowa khwiira siiso okhala wira Muluku aahihimya. Owo onrowa wira sayi? "Miyo kinookhala ni nyuwo."

Owo khwira, "Mukooniherye ovuwa Wanyu, Pwiya. Miyo kinnikukuma. Nkinwerya olavula oratta-ene. Ni miyo. . ." Owo aahikhalana mitthyawelo imilyawu sene.

⁷⁶ Masi Owo khwira, "Miyo kinookhala ni nyuwo." Nto ti yeeyo tu yaatthuneie. Owo aahirowa, okuxaka Masu a Muluku. Voohicala moota xeeni muteko waakhalaaya ntoko woowoopiha, Moise aahitthikela omwaamini Muluku. Ni Muluku aahooniherya Masu Awe, mwa Moise, wira yaari ekeekhai. Okhala wira, voohicala etthu yaakhumelenle, Moise aahikhala ni Masu. Okathi wa mukwaha. . .

⁷⁷ Muluku aahaahimeerya, wEjitu, nave-tho, wira Owo aanwoopola, "Aaroihaka muttethe wa natiri, muttethe wooreera, woosareya eleethi ni oravo." Nto waari weiwo voomalela. Awo khiyaasuwela wira waari weiwe, masi Owo aahihimya, "Ori weiwe, ni Miyo kihoovahani. Owo ti wawinyu, murowe paahi mwawanele!"

⁷⁸ Nto mothakoni, okathi anci-ene aya waakhumme-aya, yiinaka Muroohoni, okathi Miriyamu oopalyaawe ekoma; olyaaka emana ya Wirimu; yaahimwiiwa Moise wiipa Muroohoni; yoonaka miiriirya ni ithoonyeryo wiiriwa. Masi vaphiyenry'aya wehereriwa, waamini Masu othene a Muluku, natiri othene, awo yaahivonya.

Aili paahi a yaawo ti yaaminni iyo, awo yaari Yoxuwa ni Kalebi. Ni awo yaahiruhasa ekeekhaiyi wira muttethe owo waari wooreera.

⁷⁹ Masi, sookhumelela saari, yaari yeeyo yaakhottihenrye. Okhala wira, awo yiirale, "Hiyo khaninwerya okuxa muttethe ole, okhala wira ipooma saya sitekeleliwe makokoro, awaya—awaya—anamurummwa aya iwe. Kahi anamurummwa aya, masi awaya—atthu aya t'okorosowa aalupale. Vano, hiyo ninooneya ntoko anasope, mpararini mwaya."

⁸⁰ Yoxuwa ni Kalebi khwira, "Hiyo ninniweryaxa okuxa." Mwaha wa xeeni? Muluku aahaavaha, hata wira ookorosowa awo yaannunwe sayi. Ekhottiheryo khiyaahimya etthu wa awo. Muluku aahimye siiso! Ni Muluku aahooniherya eyo mwa yaawo. Nto awo yaahilapuwa khukuxa muttethe, ntoko Muluku saahimyaawe wira yaamwiira. Owo aahiwooniherya.

⁸¹ Vano, okathi waaronwaaya mweeri wa Aprili, okathi maasi yaamoraaya okhuma mmyaakoni, mwaha wa nakhutu oothukumanyeya, ni sikina, ni yaakhala ntoko wira Muluku aari mukhulupale ooveya, weetiherya muttitthi Awe w'anakhotto nipuro, vaavo Owo aahiyalyaawe oottiyeleliwa wa muttethe wa natiri. Nto okathi ene yoowo Owo aalapunxe-awe, aarowaawe waalapuxa, waari mweeri wootepaxa wa mwaakha. Mweeri muro Yordani waatekhumelaaya mukerekhere mwaya, waanaataleleya mpakha mmamatta. Vano, vakhala wira awo yaarowa waalapuxa, yaarowa okhala elimwe, yaarowaaya owerya olapuwa mwentto. Masi Owo aahilipelela mpakha maasi okhala oowiixa. Owo omusivela wooniherya wira Owo Mulukuu. Owo omusivela wooniherya Masu Awe, vakhanleru siiso.

⁸² Voohicala sinto meetiku ohimnye wira, "Munookhwa ni kankuru." Ti yeeyo tu mutthu onsuwelaawe. Khino maasi ari oowiixa wa amosa-amosa a nyuwo, ohiy'ula. Masi, muupuwele, Muluku oommana natiri. Muluku onnimaliherya Masu Awe, ni Muluku onnooniherya Masu Awe. Awo Ekeekhaii.

⁸³ Owo aahilipelela mpakha maasi okhala a marove, mpakha awo okhala oowiixa ni vasulu va muru aya, ni siiso, vano nto Owo khutthukula ephiro. Owo aahirowa ohoolo waya khupaka ephiro.

⁸⁴ Yaarowa okela sayi, oYeriko, ori-ene woowaliwa wothene? Yoxuwa aathuna osuwela. Owo aahisuwela wira Muluku aahimweetiherya mpakha nipuro nle, nivalo ninttharelana ti na Muluku.

⁸⁵ Nihiku nimosa, okathi waaryaawe vate eettakasaka, owehaka makokoro, aahimoonna Mulopwana mmosa eemenle ni xoowa Awe omutholonle. Vano owo aahimukumiha xoowa awe khurowa okumana ni Mulopwan'owo, owo khwira, "Nyuwo muri n'ani? Nyuwo muri ni hiyo wala Nyuwo mwa a nwanani ahu?"

⁸⁶ Owo khwira, "Miyo ka Mukhulupale a anakhotto a Apwiya." Nto Owo khimuleela etthu yo wira. Owo aarowa orumiha sayi nlope vano nikokoro nikomowe, vaavo vaaweryaneya oxiraaniwa-vo ni ikaaro sa ekhotto? Exeeni yaarowa okhalana naata ni nlope?

⁸⁷ Muluku onrumeela inamuna sookhweya. Ti siiso, okhweya wa yeeyo, t'enikhaliha Muluku wa miyo. Hiyo kweekwe nineererya ophwanya etthu yuulupale, enrowa wira etthu, nto Muluku. . . mutthenkeso mmosa muulupale onrowa okuxa etthu yothene n'ukhaliha yothene oratta-ene. Okathi, Muluku onimukux'awe mutthu owiyeviha, mutthu mmosa paahi Owo okhanly'awe omukhalihaka mmatatani mw'Awe, nto Owo onimooniherya khula Masu Owo ohimaly'awe, ni Yeela. Onkuxa inamuna seiyo sikhaani sookhweya!

⁸⁸ “Murumihe nlope.” Kahi muthipule nikokoro, masi, “Murumihe nlope paahi, nto makokoro anookomowa. Oruma wa nlope onoomoroxa makokoro.” Moota enkhalaaaya y’ololo wa muupuwelo w’erutthu! Masi Muluku aahooniherya wira Masu Awe yaari eekeekhai, okhala wira makokoro yaahikomowa, nimosa vasulu va nikina. Awo yaahiwela khukuxa epooma eyo.

⁸⁹ Oh, Muluku omusivela wiisooniherya wira yoowo Mwaneene t’okhanle Muluku! Yoxuwa aahisuwela eyo. Nihiku nimosa, ni okathi weemenlyaawe vale, emosa wa sootikiniha suulupalexa etonko okhumelela, ohiya okhwa, ovithiwa, ni ohihimuwa wa Yesu Kristu. Okathi nwanani . . . Owo aahaatthyawiha vootepanyeya, ni anakhotto oohiyana-hiyana yaari mmiyakoni. Owo aahaatthyawiha vootepanyeya, ni nsuwa naarowa otupweela. Oh, wulu, okathi xeeni waari uwo wa mukhulupale Yoxuwa!

⁹⁰ Muupuwele, owo aakenle muttethe ole owanaka, ohirina exipiritaali, nfurumeera, ekhulula ya mukhaliheryo woopacerya, wala mutthu oovulala. Mukileele etthu enwerya ovilela yeeyo. Ayo, mulopwana. Owo khonakhalaneke ixipiritaali, nnakhala manfurumeera, ni khonampweteyeke hata mutthu, okathi yeettaaya vootthuna ni Masu a Apwiya. Muluku aahooniherya wira Owo aari ni yaawo. Ti yeeyo. Nwehe vano.

⁹¹ Nto ninnoona wira Yoxuwa aahisuwela, wira waailale, awo yaamutthyawa ni yaamukumana mmosa ni mukwaawe, ni—ni yaamuthukumana ni yaampaka muttithi mukina muulupale w’anakhotto, nto owo aamukhalana okathi wookattyamiha ni yaawo mmeeloni mwaya. Owo khaasuwela yo wira, tivo khunvenxerya maitho Muluku. Owo aaniphavela mukhaliheryo, ni aaniphavela nsuwa nle wira neemele. Tivo owo khuruma nsuwa wira neemele, ni e . . . khwira wira “mweeri weemele oAhiyaloni,” wira siheette mpakha owo oruma. Nto mweeri waaheemela iwoora miloko miili ni xexe, okathi Yoxuwa aawanne-awe ekhotto ni khumuxintta nwanani, okhala wira owo aari mmutekoni. Owo aahaana ehaakhi yo wira, okhala wira aaiwelela yooruma ya Muluku.

⁹² Nto vakhalaru wira muri mmutekoni, musukaka Masu a Muluku, mwiiraka voolikana ele Owo ohimyyaawe wira mwiire, mweettelaka sooruma sa Muluku, muhaana ehaakhi yo wiirela mwaak’ole, “Othaame-vo!”

⁹³ Muluku onnimaliherya Masu Awe. “Nyuwo mwairela mwaak’ola, ‘Othaame-vo,’ muhihoveryaka mmurimani mwanyu, masi waamini wira ele ehimmy’anyu enimwiiraneya, munoowerya waakhela ele ehimaly’anyu.” Yesu ohimya eyo, mwa Marku Oowaarya 11:22. Eyo ti Ekeekhai. Koosuwela wira eyo Ekeekhaii. Awo Masu a Muluku, ni eyo ennooniherya wira awo t’Ikeekhai. Hiyo nnimoova paahi imaara sikina. Ninoophiyerya nipuro, ninoovaahu wira Owo khommaliherya Masu awo. Owo

onoomaliherya Masu awo. Owo ohimnye wira aamwiira. Vano, hiyo ninnoona wira eyo ekeekhii. Owo ohooniherya.

⁹⁴ Oprofeta wa Yesaya, emaara emosa, etthu yahaatonko okhumelela; yahaatonko wiiraneya khalayi, ni khenatoko okhuma vaavo. Owo iirale, “Mwali harusi onoorupala.” Mwaanwerya otthokelela wira muthiyana, ohimusuwenle mulopwana, aamukhalana mwaana? Yesaya iirale, “Mwali harusi onoorupala.”

Nto Muluku aahimutthuniherya harusi orupala, wira ooniherye wira Masu Awe ekeekhii. Owo aahooniherya Masu Awe, okhala wira mwali harusi aahirupala khimuyara Mwaana.

⁹⁵ Vano, Masu awo oowiipaka erutthu, nkawehani etthu Awo yinre-aya. Okathi Mwaana owo orwiiye-awe, Owo aari Masu Mwaneene. “Woopaceryani naari Nsu, nto Nsu naari ni Muluku, ni Nsu naari Muluku. Vano Nsu nihiipaka erutthu khukhala ni hiyo.”

⁹⁶ Owo aari Masu yaawo makumi. Owo aahooniherya wira Owo aari Masu yaale makumi. Owo aahaahimeerya awiixuttihi ale a nihiku nle, “T’ani onwerya okihimyana etampi?” *Etampi* “ohaaminii.” “T’ani onwerya okileela wira Miyo ka mulipa-ooaamini? Khula Masu alemmpwe mwaha wa Miyo, aamaliheriwa.” Soohimya thanu na piili sookiserya sa ekumi Awe saamaliheriwe muhina mwa iwoora thanu na piili sookiserya, vamwiikimanyo. Sothene saalempwe mwaha wa Yoowo, saahimaliheriwa, okhala wira Owo aari Masu. Owo aahooniherya wira aari, aari yoowo. Owo aahaavoniha aretta. Owo aahaahihimuxa alipa-okhwa. Owo ooxintta okhwa, omooroni, ni mahiye. Owo ohooniherya wira Owo aari Masu.

Nkawehani mwah’ola va owannyawe Xairu. Owo aari... Owo aahaahimeerya ekeekhai. Hiyo ninnimoona Owo okathi olapunw’awe ephareya. Owo onoophiya.

⁹⁷ Aahikhala mwamuthiyana mmosa vantumuxani, aahononne musurukhu awe wothene ni mameetiku. Voohihoverya, mameetiku yaahiira sothene saasuwelaaya wira, wira muthiyana owo apenuwe; alakela mameetiku aHeperi, ni owo aari muthiyana muHeperi, tivo awo yaahiira sothene saawenry’aya mwaha wa murokor’aya. Nnya, awo khiyaarina hat’etthu wira emaalihe ovuuva nno wa ephome, yeeyo yaari, khino, okathi woohikela mmweerini nave ephome awe yaahiyeeheya mpakha owo...namuhaawi owo aahitteettheya mpakha vaamurikelaawe weetakasa-tho. Ni aahiiwa sa Yesu. Nto voonalyaawe mwaatiya mwaamukhaani waapuruleliwe musalkeeroni, owo aahikhuruwa wira awehe.

⁹⁸ Anci-ene w’alipa-oowuulemela Awe yaaphwanyaneya vaavale. Ni Owo khohiyale okhalana alipa-oowuulumela olelo. Awo yaasuwenle-ru wira Owo aari Pani, khiyaarowa okhala

alipa-oomuulumela Awe. Masi awo yaari alipa-oomuulumela Awe okhala wira khiyaasuwela wira Owo aari Pani.

Nto ti siiso ni Mutthaka olelo, alopwana anci-ene ooreera murima ni athiyana annuulumela Ola okhala wira khansuwela exeeni Ila.

⁹⁹ Yesu iirale, “Mwaamusuwenle Moise, mwaamukisuwela Miyo. Moise aahilavula mwaha wa Miyo. Atthu anci-ene aalupale yaahiphavela woona nihiku nla. Kaahivareke miteko s’Atithi Aka, weeso muhikaaminiki. Miyo kookhalana onamoona muulupale,” Owo khwira, “ovikana ole wa Yohani, maana miteko Miyo sinvar’aka, sinnooniherya wira Atithi ari ni Miyo.” Owo aarina miteko suulupalex, okhala wira Owo aari ole Oosuwanyeihiwa. Yohani aahisuwanyeihiwa nave, ntoko nsu na ole onikhuwela mothakoni. Masi okathi Owo orwiiy’awe, Owo aari profeta Moise aamuhimmyaawe wira aamuthanliwa.

Ntoko saahimaly’aka ohiyu mukina, Owo aarwiiye mwa masina mararu; nsina na Mwaana a Muluku, Mwaana a mutthu, ni Mwaana a Davidi.

¹⁰⁰ Okathi Owo aary’awe elapo ya vathi va, emaara yoopacerya, Owo aari Mwaana a mutthu. Owo khaakhanle okhalaka Mwaana a Muluku okathi ule; Owo khonahimyeke okhala. Owo ohimnye wira aari “Mwaana a mutthu.” Okathi mutthu aamukohaawe, Owo iiraka, “Nyuwo munnimoona Mwaana a mutthu; Mwaana a mutthu.” Vano, “Mwaana a mutthu” ti *profeta*. Owo aahaana orwa siiso, okhala wira, Yoolempwa, Owo khokhanle orwaaka voovirikana ni Soolempwa.

¹⁰¹ Tivo, olelo, wira mu—Mutthak’ahu wa okathi ula khokhanle orwaaka ni mateyooloku ni teyoloxiyya, ohaana olikana ni etthu emosa-mosaru owo olaihenryaaya wira. Ohaana okhala siiso.

¹⁰² Tivo hiyo ninnoona wira, mwa Mutth’ula, Owo aahaana okhala profeta. Kahi Mwaana a Muluku vale, Owo aahaana okhala Mwaana a mutthu. Yehova Mwaneene aawihanne maprofeta, Yeremiya n’akina, “Mwaana a mutthu.” “Mwamoonaru Mwaana a mutthu. . .” “Taani okhanle Mwaana a mutthu?” awo yaanikhala ekohaka.

¹⁰³ Vano, Owo aahirumeela muteko Awe ntoko Mwaana a mutthu. Nto Owo oorumeela muteko Awe vano ntoko Mwaana a Muluku. Muluku Eroohoo, nto okathi vano Owo orumeenle-awe moovirani wa Okathi wa Ekereja, ntoko Mwaana a Muluku. Vano, oMileenyu, Owo onrowa okhala Mwaana a Davidi, okathi Owo onikilaathi-awe veehicensi va Davidi. Owo onrowa okhala mulipa-oorithi ehice, Mwaana a Davidi. Mwaana a mutthu, Mwaana a Muluku, Mwaana a Davidi, nto Mutthu mmosaru okathi wothene.

¹⁰⁴ Ntoko Tithi, Mwaana, ni Erooho Yoowaarya; muteko wa Muluku. Owo aari Muluku Tithi, nto Owo khukhala Muluku Mwaana, vano Owo ti Muluku Erooho Yoowaarya.

Kahi aMuluku araru; Muluku mmosa, wiisooniherya vararu, mikhalelo miraru sa Muluku mmosaru.

Vano ninniphwanya, ni okathi ula ninkhal'ahu vano, Muluku onnimaliherya Masu Awe siiso ntoko Owo siiraly'awe okathi ule.

¹⁰⁵ Hiyo ninnoona wira Owo aahirwa epantte ekina ya ephareya. Muthiyana ola aahimwaamini Owo, yaahikhala etthu mwa yoowo yaapacenrye omutuphiha murima. Owo khaarina hata Yolempwa ya yeeyo, nnakhala-tho Yolempwa onvikana Yoxuwa aarinaawe wira eemexe nsuwa, masi owo aanaamini mmurimani mwawe wira Ole aari Mwaana a Muluku. Vano owo khwira, "Kawerya-ru okwannya nlaya Nawe paahi, kinoovona." Vano owo aahipunyeerya varyari va muttitthi mpakha okwannya nlaya Nawe, nto ovuwa w'ephome waahimala.

¹⁰⁶ Vano, Owo aahiweha vamuthukumanoni, wira osuwele taani aamukwannyale Yoowo. Voohihoverya, aahikhala mutthu. Owo khweemela. Atthu othene amphunyaka Yoowo; nto akina amunyemulaka, akina emutheyaka Yoowo; namukuttho eemenleene epantte awe amukohaka, ni alipa a tiini, n'akina. Masi yaahikhala akina yaamwaamini Yoowo. Nto, nto okathi vakhani Owo khweemela, naanaanoru, khurukunuwa, khwira, "Taani okikwannyale?"

¹⁰⁷ Akina wa awo khwira, "Vano, Mwiiixuttihi!" Kookupali wira aari Petru iirale, "Vano, muttitthi wothene onoophunyani Nyuwo. Vano, taani 'ookwannyaleni'? Vano, atthu othene anookwannyani Nyuwo!"

Owo khwira, "Masi kinnoona wira owerya wookhuma mwa Miyo." Owo aahitteettheya. Yaari muthinto mmosa ya ekwannyelo yoovirikana.

¹⁰⁸ Vaakhanle wira naamuwerya woona yeeyo paahi, munna mulopwana, muthiyana! Mwawerya-ru omukwannya Owo ni ekwannyelo yeeyo! Oh, atthu aretta, miyo kihanle woovekelelani, muhina mwa minuutu vakhani paahi. Miyo kinnaamini wira kookhalana Erooho Yoowaarya, voohivikana Erooho Yoowaarya ele murin'anyu vo, axilopwana ala arinasaaya va. Erooho Yoowaarya emosaru, masi eyo ti yooruma ya Muluku; nto nyuwo mwaaminiru wira eyo ti yooruma ya Muluku, yo waavekelela aretta, ni owiixaatherya matata yaawo, ni woomola irooho sootakhala, ni anatiri Owo aahimye-awe, enrowa okhala etthu emosaru ni nyuwo. Munimwaakhela ele envekel'anyu, mwaaminiru.

"Nyuwo munniwerya waamini wira Miyo kinniwerya wira yeela?" aahimye ti Yesu.

¹⁰⁹ "Ayo, Pwiya, miyo kinnaamini," aahimye ti mulopwana aarina mwaana aakhwa ecile, "Miyo kinnaamini wira Nyuwo mwa Mwaana a Muluku aatthuna orwa molumwenkuni." Vano, noosuwela wira onthuneya mweettelo yoowo paahi wira oruue iphwanyeryo.

¹¹⁰ Vano, naakuvaka, nrowe nimuupuwele Yoowo okathi vakhani, va Owo onoorowa mphironi. Namukuttho mmosa mwaamukhaani khukhuruwa, voohihoverya wira mwaapar'owo aari mulipa-oowaamini a mmukaanoni.

¹¹¹ Aakhala anci-ene a yaawo mulaponi olelo, alipa-oowaamini a mmukaanoni. Awo annitthuna waamini Iyo. Awo annitthuna waamini wira Erooho Yoowaarya ti y'ekeekhai. Awo annitthuna waamini wira ola ti mweettelo w'arummwa, ntoko Muluku saahimmy'awe wira mahiku ookiserya Owo aamurowa omwaraxa Erooho Awe. Hiyo...owo onnitthuna omwaamini Malakhiya 4, wira Owo oohimya, mahiku ookiserya wa—Waamini wa pentekosite woopacerya waamuhokoloxeriwa-tho e—ekereja.

¹¹² Malakhiya 4 onnihimya. “Moone, Miyo kinimoorumihelani Eliya nihiku nookiserya,” ti yeeyo, “ni owo onimwaahokoloxerya Waamini aana otthikela w'axitiithi aya tho,” moone, “Waamini w'axitiithi wa aana, nave.” Moone, ehaana okhala.

Nyuwo muniira, “Ahe, ole aari Yohani Mpatisa.” Nnari, nnari.

¹¹³ Yohani Mpatisa aari Malakhiya 3. Ti yeeyo. Matewu 11 onihimya siiso, “Nyuwo mwaweryaka waakhela, ola ti yoole ohimmwe ‘Moone, Miyo kinoomuruma namitthaka Aka ohoolo Waka.’” Aari Eliya, vekeekhai. Yesu ohimmye wira aari yoowo. Masi kahi Eliya a Malakhiya 4, nnakhala.

¹¹⁴ Okhala wira, “Naanaanoru nuumala Mutthak'owo, elapo enrowa opahiwa ni mooro, nto anaxariya animweetta vasulu va ittuurwa s'ale ootakhala.” Tivo eyo khenaireyeke okathi wa Yohani. Nihaana okhalana Mutthaka onrowa omwareya ni waakumiherya atthu ota wa mikhalelo iya sothene sa miromolelo, otthikela Waamini woopacerya, wooloka wa pentekosite. Ni hiyo ninnoona eyo yiiriwaka, omaliheriwa wa Yoolempwa orina wiiraneya. Soolempwa sothene sihaana omaliheriwa. Sikavi-tho ntoko yeeyo naakhanlyaaahu ohelelaka, yaamukikuxa okathi munci-ene ovikana mpakha vano, wira kooniherye. Masi nyuwo munnisuwela itthu iya, wira ela ehaana wiiraneya voolikana-ene siisa, w'ana a Abrahamu, siiso ntoko Owo saalaiheryaawe.

¹¹⁵ Ninnimoona Yesu awelaka vano wira anvonihe mwali owo. Okhala wira, atiithi awe, mulipa-oowaamini mwaamukhaani a mmukaanoni, etthu emosa yaahiphiya nipuro waarin'awe omusuwela Yesu, mpakha, meetiku omuhiya oohiroromela. Nto owo khuwara exapheyo awe yaamukhaani yooriipa khurora wira oone sinto aamuwerya omphwanya Yesu. Moone, Owo kweekwe ori vale nyuwo mwaamutthunaka. Owo aamphwannye Owo aphiyaka ophareya.

¹¹⁶ Nto owo khwira, “Murwe wa mwan'aka mwaamuthiyana, mmwiixaatherye matata Anyu, vano owo onookhala mukumi.”

Khwira, “Owo onooluwela. Owo ti mwan’aka mmose-ene.” Khwira, “Owo orina iyaakha muloko ni piili. Hiyo khanrina hata mwaana mukina. Amwaar’aka ni miyo,” khino, “nnimuuluvala. Nto ola ti mwaana mmosa paahi hiyo nrin’ahu, ni owo onooluwela. Pwiya, miyo kinniwaaminini. Nyuwo mwarwaaru paahi omwiixaatherya matata Anyu, owo onookhala mukumi.”

Moone, owo aasuwenle exeeni? Owo aahisuwela wira Masu ale a Muluku yaalaiheriwe yaahooniheriwa mwa Mulopwan’ola.

117 Vamosaru volikana ntoko Nikotemu saahimme-awe “Rabbi, mwiixuttihi, hiyo noosuwela wira Nyuwo mwa mwiixuttihi mukhumme wa Muluku. Hiyo noosuwela eyo. aFarisi annisuwela eyo.” Xeeni awo yahaahimyaaya yeeyo? “Khaavo aarowa owerya wira itthu Nyuwo siniiraanyu, ehikhanle wira Muluku ori ni Yoowo. Hiyo noosuwela wira Nyuwo munkhuma wa Muluku.”

118 Va hiyo ninnoona wira Xairu aanaamini etthu emosaru. Owo iirale, “Murwe mmwiixaatherye ntata Nanyu.” Owo aanisuwela wira Muluku aari mwa Yoowo. “Mmwiixatherye matata mwan’aka. Onaamwi ohalelaka okhwa, owo onookhala mukumi.”

119 Owo aaroorowa paahi eettaka ni yoowo. Nto okathi waarowaawe, va onoorwa namuhupi atthikaka, khwira, “Muhimuukhule Owo, muhimuukhule-tho Mwiixuttihi. Mwa—mwali, ookhwa, owo oorowa naanaano va. Owo ohookhwa.”

Yesu aahimurukunuwela Xairu, khwira, “Miyo nkooleenleni, ‘Mwaaminiru paahi, munimoona ovuwa wa Muluku’? Nyuwo mwaaminiru paahi!”

120 Owo khuvolowa okatthi, nto awo yaari vale, othene ekhupanyeryaka ni yinlaka, ni yinlaseyaka, ntoko khula mutthu saarowaawe wira. Mwali mmosa mwaamukhaani ooreera, mwaana a pastore, aahikhwa, vano owo aahikumihwa olumwenku ula. Ni khino owo aahikhwa khuvira iwoora, vano nto awo yaahimwaatalela voolilini, ni yaahilikana wira emareele erutthu awe, khino, ni onvitha, omusikha.

Vano ninnoona wira Yesu aahivolowa mpaani. Othene yaamunla. Owo oniira, “Mmaale.” Owo khwira, “Owo khokhwiiye, masi onoorupa.”

121 Vano nyuwo mwaanwerya otthokelela etthu awo yuupuwenle-aya? “Vano, mulopwan’ola hiyo noosuwela, vano. Hiyo ninnisuwela wira Owo mwaana oohiphwanela. Ni hiyo nihiiwa Sawawe, soohimya Sawe sothene soohitthokeleleya Owo onihimyaawe. Nto vano hiyo noosuwela wira namukuttho ookhalana exariya, ‘mulopwan’owo mulolo,’ maana hiyo noosuwela wira ola ohookhwa. Meetiku ohimmye wira ‘ohookhwa,’ vano owo ori vale oowaataleliwa. Owo oorowa, ni hiyo noosuwela wira ohookhwa.” Ehimmwe wira, awo

yaanimutheya Owo, mwa moolumo makina, omwiiraha Owo wuuliwa muru, mwaha wo omuulumela.

¹²² Masi Owo aahihimya wira ole khaakhwiye. Ti yeeyo tu entthuneya. “Owo onoorupa.” Voochicala wuulumela sayi, Owo onoorowa wooniherya Masu Awe! Owo aahaakumiha othene mpaani, aahaasusiha alipa-oohaamini othene. Aamukunxe Petru, Yakopo, ni Yohani, alipa-oowaamini, anamoona araru, ni tiithi awe ni maama awe, khuvolowa khunvara mwali uwo ntata, khulavula elavulelo yaaihanne munepa awe otthika okhuma nipuro nlo wu wa Ohimala. Vano mwali uwo khukhala mukumi.

¹²³ Owo aairale exeeni? Owo oonihenrye Masu Awe. Owo oonihenrye ele aahimyyaawe. Ole khaakhwiye. Ole aamurupa. Vano ninniphwanya wira, airaka yeela, nisuwelaka, ni Owo aahooniherya etthu ekina vale. Vano Owo aahooniherya wira aari Muluku. Owo aahooniherya wira aahikhalana osuwela khalayi ene. Nkawehani etthu Masu Awe ahimmy’aya vano. “Owo khokwiiye, masi onoorupa.” Moone, owo khaakhwiye, opacerya wene. Owo aamurupa. Aahooniherya osuwela Wawe khalayi ene. Vano, khino siiso yaakhanle aximwali anci-ene yaakhwiiye voosiisu yoole, masi ola khaakhwiiye. Ola aamurupa, ntoko Laasaru saarupaawe. Ni Owo aahimwiihana okhuma mukhoveni mmwe, okhala wira khaakhwiye.

¹²⁴ “Ni ole onikaamini Miyo, hata onakhwaaru, onookhala mukumi; ni ole orina ekumi ni onikaamini Miyo, khankhwa-tho.” Yaale paahi ari Multiivuruni mwa Ekumi ya Mwaapwittipwitthi, Owo aavulunxe-awe okathi Owo okhwiiyaawe, ti yaawo Owo onrowaawe owiihana mukhoveni mmwe, nihiku nenlo, ale ankhalihiwa akumi ni owerya Wawe, arina owerya iwo wookhaliha mukumi mwa yaawo. Hata ntoko sihimaly’aka nsana ohiyu; hata vaakhwiiyaawe Elisewu, ni makhuva awe khuheliwa mmahiye, owerya iwe wookhaliha mukumi nlelo waari mmakhuvani mwawe.

¹²⁵ Vekeekhai, Owo aahooniherya Ole aaryaaawe. Vano ninnoona-tho, siiso, Owo aahooniherya nave-tho, wira, mwa aHeperi kapiitulu 4 versiikulu 12, Owo aahooniherya wira aari Masu a Muluku. Vekeekhai Owo aahooniherya. Nkawehani etthu Owo iiraly’awe. aHeperi, 12, aHeperi 4:12 anihimya wira, “Masu a Muluku t’oweryaxa, makumixa onvikana xoowa oniitha ninno ni nno, ni—ni Annilamula miyuupuwelo ni sintthunaaya murima.” Nwehe okathi vakhani paahi vano.

¹²⁶ Okathi Owo opaceny’awe muteko Awe, nuumala okhuma wira ooniherye wira Owo aari Masu, okathi Owo okhumaly’awe mothakoni okhuma moottehattehiwani Wawe, aahikhala mulopwana mmosa aaihaniwa Petru, nsina nawe okathi uwo aari Simoni. Vano owo khurwa wa Yesu ni munn’awe, Antere. Nto vamanlyaawe weetta khuphiya Ohoolo wa Yesu Kristu, Yesu khwira, “Nsina nanyu ti Simoni. Ni atith’inyu yaari Yona.

Okhuma vano mpakha ohoolo munrowa wiihaniwaka Petru.” Eyo yaahooniherya wira Owo aari Masu, okhala wira Masu Annilamula miyuupuwelo ni sintthun’aya murima. Owo aari Masu.

¹²⁷ Filipe aahooni yeela wiiraneya. Owo aahirukurerya mwaako, aahikhuma nihiku nimosi, khutthika. Vano owo aahimuruuha ni yoowo mpatthani mmosa aihaniwa Natanayeli. Nto owo khwira, “Itthu iya vekeekhai sinimwiiraneya. Moise oohimya wira ‘Apwiya Muluku ahu anoomuthanla Profeta’ oolikana ni yoowo, nto va ori Mutthu ene yoowo. Vano, Owo khumuhimeerya Simoni aari pani, hata ale yaari atithi awe, ni hiyo noosuwela wira etthu Owo onihimya’awe ekeekhai. Okhala wira, Muluku oohimya muhina mwa Masu, nto va ehoniheriwa wira Owo aahaana wira yeeyo, ni eyo ennooniherya wira ole ti Mesiya.”

Nto weettalyaawe mpakha Ohoolo Wawe, Yesu khumwiirela, khwira, “Ola va mwIsarayeli, mwa yoola khuuvo-vo wootha.”

Owo khwira, “Rabbi, mukisuwenle liini?”

Khwira, “Filipe ohinatthi owiihanani, okathi waaryaanyu mukhitte mwa mwiri, Miyo kaahiwoonani.” Owo aahooniherya Masu Awe. Owo aahooniherya Masu a Muluku. Owo aahooniherya.

¹²⁸ Muthiyana veehimeni, okathi waarin’awe...Ahe, Owo aahivekela wira amutthuniherye Owo owurya maasi mmunoni owo aarikanaawe maasi veehimeni, nto owo khwira, “Khanilimalenle nyuwo aYuta onivekela hiyo athiyana aSamariya etthu ntoko eyo, okhala wira khaninlavulihana.”

Owo khwira, “Masi mwaamusuwenle-ru Ole onlavulan’anyu, mwaamukivekela Miyo maasi.”

Owo khwira, “Ehimye ti yoowiixa.”

Nto nvaanelo, okelelaka ohoolo, vookiserya Owo aahiphwanya ole waari mulattu awe. Nto Owo khwira, “Murowe mwaakuxe aiy’anyu, murwaase va.”

Owo khwira, “Miyo nkirina aiy’aka.”

Owo khwira, “Moohimya ekeekhai, maana mwaahikhalana athanu, nto ole munkhalan’anyu vano kahiyo iy’anyu.”

¹²⁹ “Vano,” owo khwira, “napwiya, kinoona wira Nyuwo mwa profeta.” Owo... “Hiyo khinaarina hata mmosa mwa miyaakha imiya xexe, moosuwela.” Khwira, “Kinoona wira Nyuwo mwa profeta. Vano, hiyo noosuwela wira Mesiya arwa vale, yoowo onihaniwa Kristu, okathi Owo onrwaawe, Owo onoonihimeerya itthu iya. Eyo enrowa okhala ethooneryo Awe.”

Okathi Owo iiralyaawe, “Miyo ka Yoowo kinlavula ni nyuwo,” Owo aahooniherya Masu Awe. Owo...hiyo ninnoona

etthu Owo ohimaly'awe okhala. Owo aari Mesiya, Mwaana a Muluku.

¹³⁰ Vano ninnoona wira, nave-tho, wira mwaamuthiyan'ola aavuuva ephome ela, aahikwannya nlaya Nawe, wira nave-tho aahimooniherya wira Owo aari Masu a Muluku.

¹³¹ Vano muupuwele, ohiy'ula, Yesu ohimmye wira... Nave-tho, mwa aHeperi, 1, aHeperi kapiitulu 3, kookupali wira ti yeeyo, Owo ohimmye wira, "Owo vano ti Namukuttho Muulupale," okathi ula onikhal'ahu vano, "Namukuttho Muulupale okilaanthe Momwene wa Muluku, Wirimu, onwerya onimorela ikharari mwaha wootteettheya wahu."

Aheperi 13:8 ahimmye wira, "Owo mmosaru, nsana, olelo, ni mahiku othene." Owo ti Muluku mmosaru yoole Owo aary'awe okathi ule. Owo mmosaru ohiy'ula.

¹³² Yohani Oowaarya 14:12, Owo ohimmye wira, "Ole onikaamini Miyo, miteko sinvar'aka nave-tho owo onoovara. Hata soovikana iya owo onoovara, maana Miyo kinrowa w'Atithi Aka." Munnona? "Ole onikaamini Miyo, miteko iya sinvar'aka owo onoovara nave."

¹³³ Mwa Matewu 28, Owo ohimmye wira, "Okathi vakhani nto olumwenku khunrowa okoona-tho, masi nyuwo munookoona, maana Miyo kinookhala ni nyuwo mpakha omala olumwenku."

¹³⁴ Yesu Kristu mmosaru nsana, olelo, ni mahiku othene. Owo omphwanyaneya, ohiy'ula, wira ooniherye Masu Awe. (Okathi aka woomala.) Masi Owo aahooniherya wira aaniwerya. Owo aahooniherya Masu Awe nto, etthu Owo aalaihery'awe nihiku nle. Owo aahooniherya moolumo a Yesaya. Owo aahooniherya moolumo a Nowe. Owo aahooniherya moolumo a Moise. Owo aahooniherya moolumo a khula mmosa wa maprofeta.

¹³⁵ Owo aahihimya wira nihiku nla, nihiku ninkhal'ahu, wira olumwenku waamukhala mwa mukhalelo w'oSotoma, oorupihana alopwanaru. Nkawehani paahi molumwenkuni olelo, mulaponi mothene weiwo onrowaaka-wo; kahi wenna paahi, mapuro othene. Ti yoovila. oSuweesiya, aximiravo ni aximwali anrowa omweetta skii, ahiwan'etthu voomalela. Ni ale wAlemaanya ni oFransa, mapuro othene makina, vekeekhai muthinto mmosaru w'athu oohureya hiyo nrinaahu nno oStadu Unidu. Ola okathi. Miyo, kakhalanaru mureerelo wo otthika, kaatthuna kooleeleni itthu kamosa-kamosa s'oprofeta, nyuwo, wira kiwooniheryeni yeeyo, okathi onkhal'ahu. Bibilia ohimmye wira, "Aana yaamwaaruma axitiithi aya." [Nipuro vahiitthu mufiitani—Mol.]

¹³⁶ . . . Masu. Masi, muupuwele, Abrahamu aahikhalana osuulu, yoowo aari epyo Isakhi. Owo aahikhalana osuulu mukina nuumala okhwa wa Saara. Ni owo aarina miyaakha emiya ni miloko mixexe ni mithanu, aahimuthela muthiyana mukina, khukhalana aana athanu naanli alopwana waahiya athiyana,

okhala wira Muluku aaroomurukunxa khukhala mmiravo okathi waarinaawe miyaakha emiya. Owo nto aahikhala-tho miloko mixexe ni thanu, tivo nto owo. . . Hiyo noosuwela eyo. Miyo kihoolaleeryani yeeyo nyuwo oCalifornia nno, miyaakha sivinre.

¹³⁷ Nto vano hiyo ninnisuwela wira Osuulu w'Abrahamu khayaari epyo vekeekhai-vo y'ekhapa mwa Saara, yoowo aari Isakhi, yoowo okhalinhe nloko, masi Osuulu wo omwene waari mwaha wa natiri, yoowo aari Yesu Kristu. Nto mwa Osuulu ule, Owo oovenxa Osuulu wo omwene. Oh, wulu! Vano hiyo na onamukuttho wa mwene, nloko n'atthu oomwene, nloko noowaarya, nininvaha mittotopelo Muluku, mukuttho wa iyano sahu sinttotopela Nsina Nawe. Muluku aahooniherya Masu Awe, Owo oonimwaraxela Erooho Yoowaarya.

¹³⁸ Owo ohimnye wira, "Ntoko saaryaya mahiku a oSotoma, siiso enookhala nihiku Mwaana a mutthu onrow'awe wiisooniherya." Vano nyuwo mooweha? Okhuma Mwaana a Muluku, okathi vakhani Owo ohinatthi okhala Mwaana a Davidi, Owo onniisuupululula-tho Mmansawe ntoko Mwaana a mutthu. Nyuwo mooweha Yoolempwa?

¹³⁹ Maana, Owo kweekwe onniira, Owo khoniira hat'etthu ohikhanle wira onimwaasuveliha arumeyi Awe maprofeta. Ti voolikana. Ti yeeyo aari natiri Awe. Munnoona? Owo khonaireke etthu. . . Muluku khokhanle woothaka. Owo okathi wothene onnisuweliha, toko, Owo ohinatthi wira.

¹⁴⁰ Nkawehani mukhalelo omphwanyanyaahu-mo olelo. Nkawehani vattu vary'ahu. Khula mmosa a nyuwo munookupali wira nri muSotoma a vano. Moosuwela wira elapo ela enoophwanya sookhumela mwaha wa yeeyo. Yookhala. . . woohikhala miroromelo; kuuvo-tho woopowa wa elapo ela wala hata elapo ekina. Hiyo nri voovikana eyo vano. S'eprofeta saalaleeriwe mwaha wa yeela, soomaliheriwa. Muluku onimuurula, akuxaka epwittipwitthi iyo yaamukhaani yookiserya khula nipuro varyaaya. Sothene sinookhala muhina, nihiku nimos. Hiyo nri okathi wookiserya. Nkawehani, voopuroni.

¹⁴¹ Miyo kinnoovekelani, ntoko munna mulopwana wala muthiyana, wira mulipiherye okathi vakhani-tho wo waamini nihinatthi waavekelela atthu ala. Ni koosuwela wira khanirina okathi wookhalihwa wira nirowe. Masi miyo—miyo—miyo kintthuna kipacerye eliinya ya mavekelo, nto nyuwo munthuna orowa muroweke nto. Munnona? Nyuwo munthuna okhala muliinyani mwa mavekelo muhaleke. Masi mukihye paahi, ntoko munna mmosa, koohimeeryeni etthu emosa paahi okathi vakhani.

¹⁴² Nkanweheni Yesu, mwa Luka 17:30, moone, okathi Owo aahimyaawe vale mwaha wo okathi wookiserya, moota

yaarowaaya okhala ntoko mahiku a Nowe. Vano Owo ohimnye wira, “Ni ntoko, siiso, mahiku a oSotoma,” ohimnye wira, “okathi Mwaana a mutthu onrow’awe wiisooniherya.” Mwaana a mutthu emaara ekina, kahi Mwaana a Muluku. “Mwaana a mutthu,” moone, eyo ennimuruuha-tho Malakhiya 4, omuhokoloxa. Ni oprofeta ola wothene mukina sirwaaka, moota yaathuneyaaya wiiriwa. Owo onnooniherya wira Masu Awe ti siiso. Ti yeeyo.

¹⁴³ Nto nwehe, wira siiso, moota Owo onrowaawe waamwaraxela Erooho Awe atthu othene, ni etthu enrowa wiiraneya, moota wuuluuliwa onrowaaya ohokolowa. “Ni an’inyu alopwana ni athiyana anoolaleerya s’eprofeta. Arumeyi Aka athiyana ni alopwana kinimwaamwaraxela Erooho Aka. Ni kinimooniherya ithoonyeryo osulu wirimu.”

¹⁴⁴ Kookhalana elatarato va, ya Munna Lee Vayle va. Kaatthuna kiwooniheryeni paahi etthu yaakhumelenle vamwaako, nihiku nlo, okathi anamwane othene a oxikola yaahiiwe-aya okhuma, okathi vakhani mwaha ola muulupale ohinatthi otthukuliwa, Ikanyeryo iye Thanu na piili. Okathi anamwane a oxikola yaahiiwe-aya okhuma, okathi waaryaaka vasulu vale kivekelaka, va waari Mooro volikana-ene ntoko efunttuli yaakhuruwa, vano khutthikela owela khuruma, khurukunuwa khukhuruwa-tho. Ti yeeyo Owo aahimyyaawe etthu yoorowa waahimeerya atthu. Hiyo...Eyo eri vo, weiwo ixikola sa oTucson...ni weiwo Ela yaawenle-aya musulu.

¹⁴⁵ Nto siyensiya khukumiha ilatarato, ni siiso, khukohakoha mwaha wa Yeela. Awo khwira, “Eri vayi Ila? Exeeni ekhumelenle?” Awo khanwerya otaphulela eyo, moone. Oh, eyo kheniiriwa voowiipitha, muupuwelo paahi wooriipela. Eyo nnakhala...Yesu, okathi Owo waaryaawe muumu, yaahikhala atthu imilyawu sene hata yahaasuwenle wira Owo aari elapo ya vathi. Ayo. Anookhala atthu imilyawu olelo ahinrowa osuwela saana, imilyawu miloko sene a yaawo.

¹⁴⁶ Masi anookhala, w’ale anveleeliheriwa Yeela, awo anoosuwela saana. “Ale aankhili anoomusuwela Muluku aya nihiku nlo, ni animwiilipiha.” Hiyo ninnisuwela eyo, ewoora enkhalaahu vano.

¹⁴⁷ Nkawehani oSotoma vano, nkawehani etthu yaakhumelenle. Owo ohimnye wira, “Ntoko saary’aya mahiku a oSotoma.” Naahikhala nikhuru n’atthu yaamphavela mwaana oolaiheriwa. Hiyo ninnaamini iyo. Owo aari Abrahamu nnikhuru nawe. Naahikhala nikhuru nookuttihiwa, Lothi, oothikela ottuli vakhani, nnakhala vo mulipa-owaamini; oSotoma. Mixovo miraru s’atthu.

¹⁴⁸ Kweekwe sinkhalaka mixovo seiyo miraru. Atthu a Khami, Semi, ni Yafeti. Nave-tho, alipa-oowaamini, oowiipaka waamini, ni oohaamini. Awo ari mapuro othene, ni hiyo—hiyo

ninnaaphwanya mwa khula nikhuru. Nto, mapuro othene, nyuwo munimwaaphwanya. Ni makhuru awo nlelo ari vaava. Nyuwo muhaana ovalaaniha eyo. Vanooweryaneyya okuxa eyo mwa Soolempwa, enoolikana oratta-ene paahi.

¹⁴⁹ Mwiiwe ela. Nkawehani vatthu hiyo vamphwanyaney'ahu, vopuroni ni v'oprofeta, ohiy'ula. Vano, khula mmosa a hiyo onnisuwela wira olumwenku ori mukhalelo w'oSotoma.

Hiyo ninnisuwela soolaleeriwa sothene sa Isarayeli, ori elapo awe. Mwaatthunaka osuwela veelapo nipuro nimphwanyaneyaahu, munwehe Isarayeli, vatthu varyaawe.

¹⁵⁰ Mwaatthunaka osuwela ole okhanle mukhalelo wa ekereja, nweheke moota athiyana siniir'aya. Owo ekereja. Mmoone, oohureya, oohisuumaaliha; nwehe, moone nipuro ekereja varyaaya. Nwehe paahi, moone, moone, mwaawehe athiyana paahi. Munimoona vatthu, moota athiyana anyu anihononeyaaya ni okhala oopahuwa, ti siiso ekereja anyu siryaaya, moone, ethoonyeryo.

¹⁵¹ Nkawehani varyaawe Isarayeli, munnoona mooniheryo wa mammeru wa okathi oryaahu. Moone, nwehe paahi ithoonyeryo iye ni mitikiniho. Vakhala wira—vakhala wira, wala maitho anyu yakhala ootthukuwa, moone vatthu varyaahu.

¹⁵² Vano nwehe mwa mukhalelo vatthu vamphwanyaneyaahu, olumwenku ni mukhalelo wa oSotoma. Vano nwehe, "ntoko saary'aya." Vano nwehe, aahikhala mutthu, nihiku nlo, aanwehererya mwaana oolaiheriwa aarwa. Abrahamu ni Saara, awo yaanwehererya mwaana oolaiheriwa munikhuruni mw'Abrahamu. Awo khayaari oSotoma. Masi okathi ene yoowo, mpante wookiserya wa yookhumelela, okathi vakhani mwaana oolaiheriwa ohinatthi orwa, yaahikhala alopwana araru yaakhurunwe Wirimu, Nlaikha nimosaa...Malaikha maili ni Muluku. Vano awo khukhuruwasa khulavula ni Abrahamu, mukhitte mwa karvaalyo. Eyo ekeekhai? Nto aili aya yaaronwanse oSotoma khukhuwelela itampi sa epooma eyo. Nto waari okathi vakhani ohinatthi opahiwa olumwenku w'Amalapo, okathi ule. Sotoma othene aahipweteya vaavo. Vakhani paahi ti yaakumihiwe, Lothi ni an'awe aili athiyana. Amwaar'awe hata khiyaawenrye; awo yaahitthika. Moota kaatthun'aka okhalana okathi wira kiwooniheryeni naanaano va, nipuro ekereja eyo emphwanyaney'aya vopuroni vaavo. Kintthuna wira nwehe vano.

¹⁵³ Nto Mulopwana mmosa aahanle ottuli, aalavunle ni Abrahamu, nto Owo aahimpakela ethoonyeryo Abrahamu. Nto, nwehe, Abrahamu aahimoona Muluku mwa ithoonyeryo sinci-ene suulupale. Hiyo ninnaamini yeeyo, kahis siiso? Okathi vakhani paahi mwaana aarowa orwa ohinatthi. Masi mwaana ohinatthi wooniheriwa, yaahikhala ethoonyeryo owo aavahiwe-awe.

154 Okhala wira, Mwaana, Mwaana eekeekhai, aarowa okhala Mwaana a Muluku, mwaha wo waamini wa Abrahamu, moone, aari Yesu. Hiyo nikhalaka osuulu wa Abrahamu, ookhwa mwa Kristu, hiyo na osuulu wa Abrahamu.

155 Nwehe vano okathi vakhani eyo ehinatthi wiiraneya, mwaan'ola orwa. Vano, Ola aahanle ni aalavunle ni Abrahamu, ettuli Awe erenrye eheema, nto Owo khwira, "Abrahamu." Vano, nihiku nimoso paahi eyo ehinatthi, owo aari Abram. Vano Owo khwira, "Abrahamu, amwaar'inyu ari vayi, Saara?" kahi Sarai, S-a-r-a-i. S-a-a-r-a, mwaana muthiyana a mwene. "Amwaar'inyu ari vayi, Saara?"

Khwira, "Awo ari muheemani ottuli Wanyu."

156 Owo khwira, "Miyo kinoorowa woothotolani, moone, kimuttharihaka natiri Aka miyo koomanenlyaakani." Mwa moolumo makina, "Okathi wa ekumi, Saara onoopacerya-tho okathi awe woolimaleleya w'ekumi."

157 Ni Saara, orine-ene miyaakha, emiya vano, muheemani, khuthaya muhina. Moone, owo aatheye mmansawe, khwira, "Vaaweryaneya sayi Mulopwan'owo okhalana exariya? Moone, miyo muthiyana oowuuluvala, apwiya aka Abrahamu vate vale, nave-tho oowuuluvala, ophitaana wa vatthokoni waahimala mwa miyaakha." Khwira, "Kinrowa owerya sayi okhalana-tho opuha ni apwiya aka? Awo aryeene oowuuluvala, ni miyo oowuuluvala, kivinre-ene okathi wo oyara, mitika sa mapele soomalamala, khula... 'Owo ohuuma.' Naarowa owerya sayi okhalana-tho opuha?"

158 Nto Mulopwan'ole, ni ettuli Awe orukunuwenle-ene eheema, khwira, "Saara otheyenleni, airaka, 'Vanweryaneya sayi ithu iya wiiraneya?'" Yaari exeeni iyo? Olamula sa mmurimani, ya oprofeta! Munnona? Munnona? Yaari yeeyo owo oonaly'awe.

159 Vano Owo ohimye wira, "Eyo enoottthika-tho, nto Mwaana a mutthu," yeeyo yaaryaaya eyo, owo aari Mwaana a mutthu vaavale vale. Ahe, owo aamwiihanne Elohim, "Apwiya Muluku." Elohim, mutthu ti mutthu onnisuwela wira eyo ekeekhai, Elohim ti Apwiya Muluku. "Woopaceryani Elohim oopattaxa erimu n'ilapo ya vathi," Ole oomalela mwa sothene. Mwaana a mutthu oowiipaka erutthu, Owo aaphwanyaneya vale mw'erutthuni okathi ule, ntoko eteyofaniiya, eemenle-ene vale alamulaka etthu Saara aahimy'awe muheemani ottuli Wawe. Owo oohimya. Nwehe. Osuulu wa Omwene wa Abrahamu woolaiheriwa woona etthu emosaru yeeyo.

160 Masi munwehe Lothi, owo aahikhalana namitthaka mmosa iwe, nave, aili aya yaakhuruwenle weiwe. Mmosa aya aahikhuruwela, nto mukina khukhuruwela ni yoowo, khulaleerya khuwiitthana atthu wira etthyawe oviruwa waarowa orwa.

¹⁶¹ Voopuroni, olumwenku khonatoko ophwanyaneya mwa mukhalelo yoowo, okhuma nihiku nle Yesu aamuhimme-awe natiri, mpakha naanaano va. Kintthuna kimukohe khula mulipa oolepa ihantisi okhanle mpaani, wala hata mwaiwa efiita ela, ni wiiwa okathi p'ukathi, xontte mukilepele. Miyo koomusoma wahala vano mwa miyaakha soophiyaka miloko miraru, wahala a Bibilia, ni khonakhaleke mutthu otonko aka omoona mwa wahala othene a ekereja, muhina wa okathi mithanu na miili sa ekereja. Wira hiyo nri vano mwa Lawotiseya, ni noosuwela eyo.

¹⁶² Khonakhaleke namitthaka, aatonko orowela ekereja yothene, ni nsina nimmalela ni h-a-m, mpakha vano. G-r-a-h-a-m, Billy Graham. Annikhalaka aMoody, Finney, Sankey, Knox, Lutero, ni akina, masi khonakhaleke, h-a-m, "tiithi a maloko." Vano muupuwele, owo ti G-r-a-h-a-m, ileetera thanu na mosa. Masi A-b-r-a-h-a-m-u [Abraham mw'Enkelesi—Mot.] ileetera thanu na piili. Nwehe, awo arisa ohitto iwe, Billy Graham, arowaka i—ipantte sothene sa mulaponi, ni wiihana wira ekhume oSotoma, "Mukhume, mutthyawe oviruwa onihalela orwa." Khaavo mutthu ommusuwel'aka, vapuwani, okhanle oolipa mwa Muluku, mwa nuulumo nlo na okhalihwa naxariya, ntoko Billy Graham sikhanel-awe. Owo onniwerya wooniherya. Owo kahiyo teyooloku...Kinoona wira owo teyooloku, masi kahiyo mwixuttihi ooweryaxa. Masi Muluku ori ni yoowo. Mulopwan'owo onookhala vale ni ntoko exikola ya Ttiminku, waakhaliha athu ale ookuxiwa murima. Owo murumeyi a Muluku a okathi. Wa pani? Ekereja y'erutthu, eri oSotoma.

¹⁶³ Masi muupuwele, yaahikhala ekereja emosa ya erooho, yahaakhanle munikhuruni mmwe na muromolelo, hata vakhani. Nikhuru noowihaneliwa ota, vano awo yahaakhela mutthaka, nave, ni namitthaka. Nto yaari exeeni? Olamula miyuupuwelo saari mmurimani. Muluku okathi wothene onnilipiherya Masu Awe.

¹⁶⁴ Nivekele. Tithi Oophentiwa a Wirimu, okathi ula woomaliherya, vaavo othanla onthuneyaaya wiiriwa, okathi onookelela ohoolo, hiyo khaninsuwela ewoora xeeni Pwiy'ahu aakhanlyaawe orwaaka. Ni noonaka wira soolaleerya iya sihimmwe ni Yoowo, muhina mwa maprofeta Anyu moovirani m'okathi, vano sinootaphuliwa. O Muluku, moota onooxukhuru-akani Nyuwo mwaha wa yeela, wira hata athu ookhomaala, athu oowerya mwa—mwa teyoloxiia, anwerya ovenya evirikanyaka ocencera wa molumwenkuni ni alipa-ooaamini, ni mupaineelini iya, ni woohikhala ohoverya weemela vale oochoova ni oominyala, esuwelaka vatthu vamphwanyaneyaaya ni wooniherya Masu ale okhala eekeekhai, ni Soolempwa. Vano nto hiyo ninlipelela Orwa Wanyu, Pwiya, naaminiki itthu iya sikina saahimmwe wira saamurowa wiiraneya, wira neemele ni nihakalale owoonani Nyuwo weetteetta eriyari ahu ni opaka ethu ene yeeyo Nyuwo mwaahimye-anyu wira yaamurowa

wiiraneya, mooniheryaka wira Masu Anyu t'olikana. Muluku Ohinimala, an'Inyu anwereiwa akilaathanse va.

¹⁶⁵ Nkisuwenle okathi xeeni-tho orinaahu wira nivare muteko. Nsuwa na makaaripi nootupweela. Masi Nyuwo mwaahimuhimeerya, profeta, "Onookhala Waarya okathi wa makaaripi." Ni hiyo ninnoona nsuwa nimosaru nenlo ninkhuma onkhuma nsuwa, ti nenlo nintupweela onkela nsuwa. Osilimu wentte ni nsuwa nto vano hiyo nri Olimani Onkela nsuwa, ni Ehapari yooreera yeentte ni osilimu. Vano, Tithi, hiyo noosuwela wira ela emalelo ya Ehapari yooreera, emalelo y'okathi, ekiseryo y'okathi. Owo onlakaseya okelaka mwa Ohimala. Masi Nyuwo moohimya wira Mwaana aamukhuma, Mwaana a mutthu aamwiisoniherya. Mahiku ookiserya, ela yaamwiiraneya. Waarya wa makaaripi ohoorwa, Tithi. Hiyo ninnooxukhuruni mwaha wa yeeyo. Nto voowiiyeviha ntoko ery'aya, nlelo Nyuwo munniira vookhweyaxa, imaara sinci-ene, eniviraaya vasulu va muru w'ale aalupale, ni aniihaniwa alipa-oowuupuwela voowiixerya, nave oniwuupululela anamwane vanrowaaya osuwela.

¹⁶⁶ Miyo kinvekela, Muluku, wira Nyuwo mwiire mwa enamuna emosa, ohiy'ula, wira an'Inyu oohaawa anwereiwa va emoone natiri a Muluku, ni khula mmosa avonihiwe, ni akhume va, meelo, ni irutthu isya sa ikuru, ni ekhale-tho saana. Munivahe, Pwiya, wira awo awerye oroihelana Mutthaka mmosa ni mukhwaawe, mpakha ole ookiserya okhala munikotoni, vano nto mikhora sinoowaleya. Munikhaliherye, Muluku oophentiwa. Kinnoovekelani, ohiy'ula, mwa sothene iya, Nyuwo mwapakaru-tho emaara emosa paahi, Tithi, mwaha wa miyo.

¹⁶⁷ Ya—yaakhala ntoko, ohiyu mukina, wira athu khiyaasuwenle saana eyo. Masi, miyo kinvekela, mutthuniherye yiiraneye-tho ohiy'ula, Pwiya. Okhala wira, koovikaniha okathi ovahiwaaka wira kilavule, masi nkisuwenle okathi xeeni-tho ninrowaahu okhalana wira niire yeela. Vano, miyo kinnivekela, Tithi, Nyuwo munookiiwa? Ni mwiiwe mavekelo a alopwana ala ooreera murima ni athiyana akilaathanse va ohiy'ula, asareiyeroo Anyu. Awo alipa-oowaamini, Pwiya, Nyuwo munoowerya ovara muteko eriyari aya. Ni hiyo nri... miyo kinvekela wira Nyuwo mulipiherye Masu Anyu muhimmeyanyu, "Ole onikaamini, miteko Miyo sinvar'aka nave-tho owo onoovara." Mutthuniherye wira yiireye-tho, Yesu, wira yooniherye wira Nyuwo mwa mmosaru nsana, olelo, ni mahiku othene. Kinvekela wa ovuwa wa Muluku, mwa Nsina na Mwan'Awe, Yesu Kristu. Amen.

¹⁶⁸ Vano, okathi vakhani paahi, kintthuna kisuwele athu akavi mu arina ittikitti sa mavekelo. Miyo—miyo kintthuna wira nvenxe matata anyu, khula mmosa wa nyuwo orina ittikitti sa mavekelo. Ahe, mapuro othene, kinoona wira, ari mapuro othene.

169 Kaatthuna kisuwele atthu akavi mu ahirina ittikitti sa mavekelo, nave anwereiwa, munnitthuna ovenxa matata ni wira, “Miyo nkirina ettikitti ya mavekelo, nnakhala vo kinoowereiwa. Koothoiwa.”

170 Kintthuna koovekeleni wira mukhale oottittimiha okathi vakhani. Vano, okisivela olavula ni nyuwo. Owo okathi wothene ti mukattyamiho aka, miyo nkinreere olavulaxa. Masi muhinatthi orwa, miyo—miyo kinniwehererya ni kinroromela wira Muluku onimooniherya ela ni ele kihimmye-aka wira Ekeekhaii, ni muhiye—muhiye Owo oone paahi.

Vano, akavi akilaanthe vo anwereiwa, ansuwela wira nkinsuwela etthu ya nyuwo, nvenxe matata. Nwehe eyo paahi. Vaareera.

Kinootthunani nyuwo muhirina ittikitti sa mavekelo vano. Ittikitti sa mavekelo sinimwiiwthaniwa. Kintthuna wira nvekele.

171 Bibilia ohimmye wira, “Yesu Kristu mmosaru nsana, olelo, ni mahiku othene.” Owo oniira, “Owo Namukuttho Muulupale okilaanthe vale alapelaka mwaha w’olapa wahu.” Nihaana ohimya toko, Owo ohinatthi okhala Namukuttho Muulupale, okhala wira Owo onlapela mwaha wo ohimya wahu. Eyo ekeekhaii, axinna arumeyi? Moone, Owo onlapela ottharihaka ohimya wahu ele enihimyaahu wira Owo t’okhanlyaawe, ele Owo oniirenlyaawe. Kahi etthu Owo *onrowaawe* wira. Owo ohiira. Hiyo nihaana ohimya wira Owo ohiira. “Owo ohaaxeriwe soottheka sahu, ni makhwatta Awe tanivonin’he.”

172 Vano, Atithi a Wirimu annisuwela. Ni kinoowehani, wira koone vakhala wira kinoomusuwela mpatthani aka ooreera murima a Ohio, owo n’amwaar’awe akilaanthe vaava, ti Mwenye Dauch ni mwaar’awe. Ni kookupali, nipuro na neenli wala na neeraru okhuma wa yoowo, ori-tho ti Reverendu yoowo, Mwenye Blair kimoonalayaaka nsana ohiyu. Ti vooriipela vamuthukumanoni, wa miyo, mwaha wa aluxu ala va ti vooriipela vakhani wa miyo, ni miyo—miyo nkinwoonani oratta-enexa.

173 Masi kintthuna wira nvekele. Ni muhele vamurimani vanyu etthu emphavelaanyu, nto munvekele Namukuttho ahu Muulupale, Yoowo onwerya onimorela ikharari mwaha wo ottetheya wahu.

174 Vano, miyo kihoosuwelakani, ni nyuwo mwaamuwerya okikwannya miyo othene, yaarowa okhala ntoko omukwannya murokor’inyu, aiy’anyu, pastore anyu, mutthu mmosa, khiya—khiyaarowa ophwanyiha etthu. Masi mwaamukwannyaruru Yoowo, nto hiyo nakhalaru oolikana voomalela ni Eroho Awe, vano Owo onoowerya orumeela waamini wanyu wira mmukwannye Yoowo, ni yoovaha aka wira kilavule kittikihaka ovira mwa yoowo.

¹⁷⁵ Moone, kaamukhala paahi oohilavula ntoko ela, ela t'ila va, nihikhanle nsu nilavulaka mwa yeeyo. Ehaana. . . Ela, ela ti yoohilavula ehikhanle etthu va wira elavule ovira mwa yeeyo. Nto ti siiso siryaawe khula mutthu, t'ohilavula, yaaphiyeryaka itthu iya, voohikhala wira Muluku onoolavula mwa yaawo.

¹⁷⁶ Vano nvekele, nto noone vakhala wira itthu iya sihimalyaaka ti ekeekhai. Muluku akhaliherye wira ekhale siiso. Miyo nkinihimya wira Owo onimwiira. Kinniwehererya wira Owo onimwiira. Kinniroromela wira Owo onimwiira. Owo khonakithepeyeke mpakha va, moovirani mwa miyaakha, epantte ni epantte ni molumwenkuni mothene, ni inamuna sothene sa ilapo, n'atthu imilyawu sene. Owo khonavonyeke ni miyo mpakha va. Ni miyo kookupali, vookupalixa ntoko kinaamini aka wira keemenle va, Owo khonrowa ovonya ni miyo vano.

¹⁷⁷ Kinrowa woovekelani wira mukhale oottittimiha paahi ni mukilaathi, okathi vakhani paahi. Ninrowa olaxerya muthukumano muulupale ni waavekelela aretta, okathi vakhani paahi.

¹⁷⁸ Masi kintthuna wira nyuwo, nyuwo alipa-oowaamini, wira muhikiwehe miyo paahi, masi mwaamini. Mwiire, "Miyo kinnaamini wira ele mulopwan'ole ohimmyaawe ti Yoolempwa. Miyo nkisuwenle vakhala wira khanireere opwaha mwa okathi ntoko owo sihimmyaawe wira ti niryaaahu. Masi, naakhanle-ene, vano eyo ehaana wiiraneya. Vakhala wira Masu awe ti Masu a Muluku, weeso, masu awe anoovonya masi Masu a Muluku khanvonya."

¹⁷⁹ Muluku ohaana olipiherya Masu Awe. Owo onimooniherya Awo. Owo onimooniherya Awo. "Ole onikaamini Miyo." Owo ohooniherya wira nla nihiku nookiserya. Owo ohooniherya etthu yaarowa okhumelela. Owo ohooniherya wira ela yaahaana wiiraneya.

¹⁸⁰ Nto, mupuwele, Abrahamu nnikhuru nawe khiyaakhelansetho ethoonyeryo ya Muluku, mpakha mwaana a natiri orwa. Akavi ansuwela wira eyo ekeekhai? Ethoonyeryo ele ya olamula sa mmurimani! Nto Osuulu w'omwene wa Abrahamu, mukihye kiwiiweni. . . Mukihye kooleleni, SIISO ANIHIMYA T'APWIYA, munaakhela ethoonyeryo anyu yookiserya. Eyo entthariha Soolempwa ni muupululo wa Muluku ori mmurimani mwaka, yoowo onlavula wira ela Ekeekhai. Ni kinniroromela wira munimwaamini wira eyo Ekeekhai.

¹⁸¹ Vano mwaamini. Atthu othene mwaamini paahi, mwiire, "Pwiya Yesu, mukihye kookwannenyeni. Yookhala entthunaaka mmurimani mwaka, ni koosuwela wira Munna Branham khonsuwela hat'etthu ya miyo. Miyo hata nkimmusuwela mulopwan'owo, owo khonkisuwela, masi Nyuwo munnisuwela. Nto vakhala wira owo ookileela Ekeekhai, ela enookhumelela."

Kinoovekelani, muheette vano, okathi vakhani paahi. Mukhale vekeekhai . . .

Moone, nyuwo mwa erooho. Ni miyo kinnikuxa khula erooho mu vathi wo weetiherya waka, mwa Nsina na Yesu Kristu, wira Masu Awe emaliheriwe.

Vano mukhale oottittimiha paahi. Nvekele. Munweheke Yoowo, mwiire, “Pwiya, miyo kinnaamini. Mukikhaliherye mwaha w’ohaamini waka.”

Nrowe nipacerye. Kihaana othukumanya epantte emosa ya empa nno, okhala wira, moone, anci-ene a nyuwo, ni khula mmosa wa nyuwo erooho.

¹⁸² Nkinwerya. Nyuwo muniira, “Ankhi miyo?” Miyo nkaakhanle wooleelani. Owo ti mwaneene. Miteko sothene sa Muluku ti s’omeekha. Anookhala atthu anci-ene anrowa ovonihiwa eviraka vaplataforma va, ohiy’ula, alakela khanrowa okhala anci-ene. Yothene eri mwa otthuna wa Muluku. T’ani onwerya omuhimeerya Owo etthu yo wira? Hata mutthu. Owo onvara muteko vootthuna Wawe, otthokiha Wawe Mwaneene.

¹⁸³ Masi nyuwo mwaamini paahi. Mukhale owiiveviha. Muhikhale oowuukhuleya. Munrowele Muluku paahi, mwiire, “Pwiya Muluku, miyo kinnaamini.” Munnona? “Mukitthuniherye kikwanye nlaya Nanyu. Miyo kinniphavela *elexe n’ilexe*. Koosuwela wira munn’owo khonkisuwela wala yootthuna aka, masi owo oonihimeerya mwaha wa itthu iya Nyuwo mwiiraly’anyu, ni wira Nyuwo mwa mmosaru va olelo.”

¹⁸⁴ Eyo khenookumihani nyuwo axinna va vaplataforma, khula mmosa a nyuwo. Miyo kinoovekelani paahi, axinn’aka, ntoko atthu anamakhaliherya a—a Ehapari yooreera ya Kristu. Miyo kinlavula ni nyuwo vaxariya-vo ntoko sinsuwel’aka, ntoko mu—mutthu onookhwa ni nyuwo, moone, onihiya olumwenku ula. Nihaana okhuma. Ni kihaana waakhula Nihiku na Olamuliwa, mwaha w’etthu enihimy’aka. Miyo koosuwela eyo, osuwela saana. Ni miyo kinnooxukhurelani nyuwo, mwaha wa ele mukhanlyaanyu, weemela va ni miyo, mukikhaliheryaka. Miyo kimpavela wookhaliheryani, wira sothene sinwery’aka, mwaha wa Omwene wa Muluku.

Miyo kinoovekela ni kivekaka.

Va, akavi atonko woona Waarya iwe valataratoni? Nyuwo muhona elatarato Aya? Vale Owo wiithomeiye vaavale *vale*. Khamunwerya woona Yoowo?

¹⁸⁵ Ori vasulu va muhan’ole okilaanthe vale, ni nleeso nawe. Owo oninkelelela oophentiwa mmosa. Ti yeeyo, muhano. Oophentiwa owo. . . Munnaamini wira ka profeta Awe, wala mukilevelele, murumeyi Awe? [Munna muthiyana oniira, “Vekeekhai kinnaamini.”—Mol.] Munnaamini yeeyo? Vaareera. Vano, vakhalaru wira Muluku onookuupululela etthu evonyeiye,

vano, nyuwo munookupali iyo wira enkhuma wa Muluku, siiso ntoko muthiyana aakwanyale nlaya Nawe? Vano, moosuwela wira muri—muri imeeturu mithanu na mosa wala mithanu na xexe wa miyo, wala ovikana, khamunatoko okikwannya. Masi mookwannya Etthu, musuwenlyaanyu wira mookwanyana ni Etthu, Mutthu. Exeeni iyo, ti ya muthiyana mmosa, okhanle mwan'inyu. Ti yeeyo. Munnaamini wira owo onoovonihwiwa? Owo toopahuwa ni itthu soohapala. Eyo ekeekhahi voolikana. Miyo kinnimoona owo arapelelaka, ohapaliwe-ene. Munnona? Vano, nleeso murinaanyu mmatatani, mumpweherye, ni muhihoveerye. Kinnaamini wira Muluku onoonvuluxa. Munimwaamini ni miyo? Amen.

Vano, miyo nkimmusuwela muthiyan'owo, masi Muluku onnimusuwela. Munnaamini vano ni murima wothena?

¹⁸⁶ Mulopwana okilaanthe vo ni ekamisa ya malepa, orina muxipha, munnaamini wira Muluku onimoovonihani ni wookhalihani mukumi? Munnaamini wira Owo onimwiira? Nkinatoko omoona mulopwan'owo kookhalaru. Nyuwo muhaana ettikitti ya mavekelo, mulopwana? [Munna oniira, "Nnari, nkirina."—Mol.] Khamurina? Nyuwo khamumphavela hata emosa.

"Mwaaweryaka waamini!"

¹⁸⁷ Va omphwanyaneya muthiyana mmosa ophavelaka owaha vasulu va muthiyan'ola okilaanthe va. Owo mmalapo wa miyo. Masi owo khoreere wuukhuleya. Miyo nkimmusuwela. Nkinatoko omoona, kookhalaru. Masi Muluku onnimusuwela, ni owo osuwenle naanaano va wira ookwanyana ni Etthu. Nyuwo munoovekela vo mwaha wa niwoko nimosa. Etthu mukhalenlyaanyu, khamunwerya okhala-tho ovikana ohiy'ula. Muhaana okhuma vamuthukumanoni. Muntthokiherya orowa owaani, meelo. Nyuwo khamuhiyo a wenna, wala hata khamuhiyo a oCalifornia. Munrowa onkhuma nsuwa okhuma va. Munrowa ni ntteeke. Muntthokiha, orowa ni ntteeke. Nyuwo mwa a Oklahoma. Ayo. Ti yeeyo.

¹⁸⁸ Nave-tho muri mmukhaleloni mwa okhwa. Murwiiye va wira nvekeleliwe. Khamurina ettikitti ya mavekelo. Masi nyuwo muhaamini wira mwaamurowa ovonihwiwa, mwaawenryeru paahi ophiya va. Ti yeeyo. Nave-tho, mukhalelo anyu kankuru. Kankuru ori mmakhuvani. Munnaamini wira munoorowa ovonihwiwa naanaano va? Munnaamini wira munikwanyana ni Yoowo, murokor'aka? Khino Muluku onookileela ole mukhanlyaanyu, nto eyo yaamurowa wookhaliheryani? Vaari siiso, nvenxe ntata mwaaminiki vale wira, wira (Muluku) eyo yaamurowa wookhaliheryani. Vaareera Muhano Steel, mutthikeleke Oklahoma.

Miyo nkimmusuwela muhan'owo. Nkinatoko omoona.

189 Va ookhala muhano mmosa okilaanthe ottuli nno ottuli wawe. Onihaaxeya mwaha wo wiipiwa mitika. Ni owo ookhalana-tho mwaana okhanle namuhapaliwa, ni oninkelela yoowo. Owo aaminiru, onoowerya ovonihiwa. Muhano Mason, munimwaamini ni murima wothene, ni waamini wira Yesu Kristu onimoovahani openuwa? Munnaamini?

Vaareera, nto mmwiixatherye ntata nanyu muthiyan'owo okilaanthe vakhiviru va nyuwo vo, owo onaavekelela aiy'awe ahooponwe. Muluku onimoovahani openuwa.

Nivekele.

190 Muluku Oophentiwa, miyo kinvekela wira Nyuwo munvahe eparakha yeeyo. Munvahe muthiyan'owo yoothuna ya murima awe, Pwiya. Waamini wawe ori vakhiviruxa wa Nyuwo, owo ohookwanyani Nyuwo. Nto miyo kinvekela, Tithi, wira Nyuwo mmukhaliherye, mwa Nsina na Yesu. Amen.

Vano mwaamini ni murima wothene, wira munimwaakhela. Munimwiira yeeyo? Vaareera. Muluku ooreeriheni.

Munnaamini wira aiy'anyu anoorowa woopowa, muhano? Munnaamini ni murim'anyu wothene? Nvenxe ntata, munnaamini.

191 Enkhala wira ookhala, ohoolo waka, muthiyana mmosa okhanle oorulela saana. Ole okilaanthe vale. Munnaamini wira ka murumeyi a Muluku? Munnaamini wira ka murumeyi a Muluku? Munnaamini. Vaareera. Miyo nkinoosuwelani. Ole okhanle mukacamiho anyu, itthu sa veerutthuni. Khamunreere orulela. Nyuwo mwaari wa meetiku, owo ohimye wira khaawerya wira hat'etthu, masi aari meetiku a elapo ya vathi. Munnona? Yawinyu...Nyuwo khimwaareerane mixankiho vohilekela. Ahoopweteyani aiy'anyu. Nyuwo khamuhiyo a wenno. Nyuwo vekeekhai mwa a wArkansas. Munaavya muteko, nave, ni khamunwerya ophwanya muteko. Mwaamoova wira, mwaha wa etthu, khimwaarowa wiitthaniwa. Masi waamini wanyu vano woomukwanyani Muluku. Murokor'aka, murowe, mwaaminiki. Muluku oovaheni muteko, oovaheni entthuna murim'anyu.

Muluku onnooniherya wira Masu Awe ekeekhai. Nyuwo munnaamini wira ti siiso? Vano kintthuna paahi wira nvekele ni miyo emaara ekina.

192 Muluku Tithi, Nyuwo mwa Muluku yoole oonihenrye. Okathi Nyuwo mwaahimye-anyu wira, "Mwali khokhwiiye, owo onoorupa," vano Nyuwo mwaahaana wooniherya. Vano, Nyuwo moohimya, wira okathi vakhani ohinatthi ophiya okathi wa wookiseryani, wira Mwaana a mutthu aamwiisooniherya Mmansawe enamuna emosaru Owo aairaly'awe oSotoma. Nyuwo moohimya yeeyo, Pwiya. Vano Nyuwo muhoorwa mulaponi, mwa mukhalelo wa Erooho Yoowaarya, ni muhiikhaliha eriyari ahu, ohiy'ula, hiyo athu oowaamini,

ni muhooniherya. Nyuwo muhooniherya Masu Anyu ntoko siiral'anyu nihiku nle. Pwiya, hiyo kxanimphavela-tho mooniheryo. Nyuwo muri eriyari ahu. Hiyo ninnoophentani Nyuwo. Ni ninnisuwela wira ela ethoonyeryo yookiserya okathi vakhani ohinatthi Orwa Wanyu, nittharihaka Soolempwa. Ni iruku sothene ni ithoonyeryo khasinvonyaka. Iyo sihaana okhala ekupaliheryo.

¹⁹³ Vano hiyo ninnivekela, Tithi, okathi an'Inyu anrwaaya vano wira evekeleliwe, wira khula mmosa avonihewe. Ohihale hata mutthu onwereiwa eriyari ahu, wookiseryani wa muteko ola w'ovoniha. O Muluku ootthuneya, kinvekela wira mutthuniherye muttikitthelo anyu okhale vooreera murima eriyari y'atthu Anyu naanaano va, wira khula mmosa a awo ovonihewe?

¹⁹⁴ Nto yaakhanle-ene amosa-amosa va, nlelo ahikhanle an'Inyu, ni vasulu va ilipiheryo sa itthu iya, seiyo. . . Awo ahiiwa Masu ni ahoona itthu wiiriwa, owooniheriwa voolikanexa oratta-ene, ni Ole Nyuwo mukhanlyaanyu ni ele Nyuwo mukhanlyaanyu, wira Nyuwo muri vaava.

¹⁹⁵ Nto, Pwiya, Nyuwo—Nyuwo mwaamurowa oreeriha etthu yoowoothiwa? Vano, vekeekhai nnari, Pwiya. Masi Nyuwo moolaiherya oreeriha Masu Anyu, ni Awo khiyaarowa otthika siiyo. Yaamurowa omaliherya ele Awo akhaliheriwaaya. Nto vano Nyuwo muhiira eyo ohoolo wahu, ohiy'ula, voohihoverya hata vakhani.

¹⁹⁶ Nto ni muru ahu wowuurama, aakhala atthu va ahinatoko waamini khalayi, yaatthuna ovenxa ntata? Ni muru anyu wowuurama, nvenxe ntata nanyu paahi. Ni nvenye mweemele, mwiire, "Miyo vano kinnaamini, ni murim'aka wothene. Ni kintthuna kimukupali Yesu Kristu, naanaano va." Nyuwo mwaamutthuna wira yeeyo, khula mutthu, khula mutthu ori va, ohimukupanli Kristu nlelo, ni aatthuna wira okathi yoola? Nkinrowa wooleelani. . . Murowe ekereja munthanlaanyu. Masi miyo kinoovekelani wira mmwaakhele Yesu Kristu okathi nyuwo. . . Khino nyuwo khamunrowa-tho okhala vakhiviruxa ni Yoowo mpakha omoona Yoowo mwa omutthu okathi Owo onrwaawe mw'erutthu Awe yoowooneya okhuma Wirimu. Munoomukupali Yoowo naanaano va vakhala wira khamwiirale?

¹⁹⁷ Okhalaka wira nkinimoona hata mutthu va eemenle, kinnaamini nto wira nyuwo othene mwa atthu, akumi ni oowisuwela, ni munsuwela etthu muniiraanyu. Vakhala wira mukilaanthi vo ni mukhalelo yoola, muupuwele, "Nyuwo muuliwa muru mwaha wa Miyo ohoolo w'atthu, Miyo kinimuuliwa muru mwaha wa nyuwo ohoolo w'Atithi Aka." Aahikhala mutthu aavennye, khino, ayo, vamuthukumanoni, ottuli.

198 Muluku Oophentiwa, ala atthuna, kihiniwoonaaka, wira arimweemela, awo antthuna wookupalini Nyuwo. Awo annisuwela, Pwiya, wira ela khayiiriwe mpakha okathi ula, nto vano Nyuwo munniliherya ni wooniherya wira ti siiso. Miyo kinnivekela, Tithi, wira mmurimani mwaya, othukumelihiwe vootikiniha-vo okathi ula. . . Ninsuwela sayi wira ola kahiyo mutthu ookiserya onvolowa? Ela pooti okhala emalelo ya Los Angeles. Ola pooti okhala munepa wookiserya onrowa oyariwa Momweneni. Hiyo khanisuwenle liini okathi uwo onrowaaya orwa. Nto waphiya vale, mukhora onoowaliwa, Erutthu enrowa okhala yoomalela. Khenrowa okhala Erutthu yootikiniha wala Mwaakameliwa ootikiniha. Eyo enrowa okhalana paahi eyaattelo ya mamempuru yaawo masin'aya aheliwe muLiivuruni mwa Mwaapwittipwitthi ohinatthi opattuxiwa olumwenku, yaawo Yesu aaruulyaawe waakuxa, ntoko Atamu, aakhumenle ota wira oomopole mwaar'awe. Miyo kinvekela, Muluku, wira Nyuwo mwaakhele naanaano va m'Omweneni mw'Anyu. Awo ari mmatatani mw'Anyu. Nvare muteko ni yaawo, Pwiya, miyo kinvekela mwa Nsina na Yesu. Amen.

199 Muluku amureerihe khula mmosa a nyuwo ovennye. Miyo nkaasuwela wira amosa-amosa a nyuwo mwaarimweemela. Akina yaahivenya ottuli, akina mpithela mmwe. Vano kintthuna mukiiirele etthu emosa. Xontte mukiiwe saana. Mukumane ni murumeyi mmosa va mulavule mwah'owo ni yaawo, okokhorela wamala vale. Munimwiira yeeyo? Muhihyererye wira. Vakhala wira khamunatoko opatisiwa ni opatiiso w'oKristu, mwiire yeeyo voottharelana, vano nto mukhale ni matata oovenxiwa mpakha mwaakhele Erooho Yoowaarya.

200 Vano, nto atthu anci-ene aakhalana ittikitti sa mavekelo va. Ninrowa waavekela wira evenye, ni erwe nno, ni wona waka erwe mpakha epantt'ila va. Ahiiso kaahaana orwa. . . [Munna mmosa oniira, "Nnari."—Mol.] Nkinrowa owerya. ["Murwe epantt'ila nno."] Okhuma epantte *ela* nno, erweeke ovira va, epantte *ela*, atthu arina ittikitti sa mavekelo.

201 Nto vano aakhanleene mutthu wa nyuwo onthuna orowa, ori. . . kooxeleliwa. Kileveleliwe. Kinoophavela wira vooreera vakhani-tho meelo ohiyu. Ewo. . . iwoora muloko ni minuutu muloko, ni eroroco ya vaxirini. Kooxukhuru vanci-ene mwaha wo okhala va ohiyu ula, nto Muluku a Wirimu ooreeriheni. Mwatthuna ohala wira nwehe eliinya ya mavekelo, kweekwe muri oorwa vooreera. Masi ninrowa opacerya waavekelela aretta naanaano va, ni nkinthuna woopisihani voohikhala wira munootthuna ohala. Moomwariwa mwa Nsina na Pwiya Yesu. Murettele wa Muluku orowe ni nyuwo ni ooreeriheni, ni oovaheni omumula mw'erutthuni mwanu, ohiyu wothene, ni oovaheni ekumi yooreera wira mutthike-tho meelo ohiyu. Muluku akhale ni nyuwo vano.

202 Nto ale arina ittikitti sa mavekelo nvenye mwaha wa mavekelo vano, okathi ninaavekelelaahu atthu mulaponi mothene. Vano nintthuna wira musuwele, vano, nyuwo mweemenle ni ettikitti ya mavekelo, wookhala ohoverya mmakhaleloni mwanyu? Ookhala mutthu, kileveleliwe, etampi emosa mmakhaleloni mwanyu nyuwo muhilampe-anyu? Yaakhanle-ene vale, mukihye koovekeleni ela. Muhirwe muliinyani mwa mavekelo ni etampi yoohilampwa mmurimani mwanyu. Okhala wira, muhaana... Ela yoolya y'ana, moone. Nto nyuwo mwahaari muKristu, nvahererye ekumi anyu wa Kristu, muliinyani mwa mavekelo, vano murwe. Ti ya mulipa-oowaamini. Munimwiira? Mmukupali Yoowo toko ntoko Moopoli anyu, vano nto murwe vaplataforma, wira nvekeleliwe.

203 Vano kinrowa onvekelela khula mutthu; kahi waaviriha va paahi, ntoko enamuna emosa ya muhapo. Hiyo nri mukereja vano. Kinoona wira Munna Wyatt muthiyana oonivaha niwoko wira nihale nivekele. [Munna mmosa oniira, "Ayo, ohiyo wothene, okathi onttthunaanyu."—Mol.] Hiyo pooti okhala okathi onttthunaahu. Ni kinnimuxukhuru Munna Wyatt muthiyana ni nikhuru nothene va, mwaha wo onihya wira yeeyo. Muluku amureerihe. Iy'awe oomiyala oheemela vaplataforma va, khwaavekelela aretta, mpakha owo okhwa, ntoko sinsuwel'aka, nakhotto eekeekhai a vamwiikimanyo. Nto vano miyo kimphavela otthikela kiiraka etthu emosaru, waareeriha atthu ala.

204 Nto vano kinvekela wira khula mmosa a nyuwo ovire va. . . Khamurina y'olapa etthu p'itthu muntthun'anyu. Khamurina y'ohimya etthu p'itthu evonyeie ni nyuwo. Murwe paahi mukihye koovekeleleni, ni mwaamini.

205 Munnaamini wira Muluku orookiruma wira kiire yeela? Nvenxe ntata nanyu. Munnuupuwela etthu Nlaikha n'Apwiya naahimmy'aya? "Mwaakhaliharu atthu owaaminini, mukhala naxariya mwaavekelaka, khiivo enrowa ovirikanya mavekelo." Ni nyuwo moosuwela wira eyo ekeekhai. Ennooniheriwa, emaara ti emaara.

Vano kinrowa onvekela Munn'ihu Rose muthiyana, atthuna vale, wira oope nle, *Waamini Paahi*, wala, *Meetiku Muulupale Ori Vaava*, wala etthu siiso.

206 Kintthuna wira khula mmosa a nyuwo vano mo—mopatthanani ni miyo. Munookhala, nave, nyuwo atthu muhikhanle muliinyani mwa mavekelo, munookhala mwaavekelelaka atthu ala? Ahe, mwaamanele natiri yeeyo, nvenxe ntata, "Miyo kinookhala kivekelaka, moone. Hiyo othene ninrowa okhala nivekelaka." Vaareera. Ayo.

Kaatthuna wira, vakhala wira muhaana okhuma, murowe voomaaleleya vano, wira ehihaaxe okathi onvekelaahu.

Munnaamini wira enoomala vano, munna? [Munna muthiyana oniira, “Ni murima aka wothene.”—Mol.]

Muluku Oophentiwa, kinimwiixaatherya matata munn’aka, kinnipwapwela mukacamiho w’erutthu awe. Mwa Nsina na Yesu Kristu, ela emukhume. Amen.

Mureerihwe, munna.

Nyuwo munnamini ni murima anyu wothene? Itampi sanyu sothene ti soolampwa? Nyuwo mwa, ntoko sinsuwel’anyu, moolikana wira mwaakhele openuwa wanyu?

²⁰⁷ Muluku Oophenteya, kinimwiixaatherya matata munn’aka, mwa Nsina na Mwan’Inyu, Yesu Kristu, ni kinvekela wira mukacamiho w’erutthu awe okhume, mwa Nsina na Yesu. Amen.

Itampi sothene ti soolampwa, ni nyuwo moolikana wira mwaakhele ovonihiwa wanyu? Munnaamini, munna? [Munna oniira, “Kinnaamini ni murim’aka wothene.”—Mol.]

²⁰⁸ Muluku Oophenteya, kinimwiixaatherya matata munn’aka, okhalaka wira noosuwela wira Nyuwo muri vaava, Pwiya. Kinvekela wira munvonihe, mwa Nsina na Yesu Kristu. Amen.

Itampi sothene soolampwa? Nnari, nyuwo khamuniwa. Munnaamini wira munimwiwa? [Munna muthiyana oniira, “Kookupali. Masi kinnikhala oohiwa.”—Mol.] Munnaamini.

Muthiyana t’ottiyana maaru vano. Ninrowa ovekela va.

²⁰⁹ Muluku Oophenteya, kinvekela wira Nyuwo munvonihe munn’ihu ni mukumihe ehiiwelo ela mwa yoowo. Owo omphwanyaneya molumwenkuni woowaleya, vaavo vahinwery’awe wiiwa. Kinvekela wira munvahe ovonihiwa wawe, mwa Nsina na Yesu.

²¹⁰ Kinrowa waavekela athu wira ekhale ni muru woowuurama, minuutu mmosa. Kintthuna koone etthu emukhumelenle. Vano, xontte, mwa Nsina na Yesu Kristu, ohikhale hata onivenxa muru wala maitho. Vano, nyuwo muhiire mpakha miyo wooleelani.

²¹¹ Munniwerya okiiwa vano? [Munna muthiyana oniira, “Voohiiweya saana.” Munna Branham ommana ikuphwi omosa. “Miyo kinniwerya owiiwani.”—Mol.] Munnikiiwa? [“Vakhani.”] Munniwerya wiiwa? Owo onniwerya wiiwa vano. [Munna Branham ommana-tho ikuphwi.] Munnona? Nwiriyane oruma iwo?

²¹² Vano mwaamini ni murim’anyu wothene. Munimwaamini? Ni mwaamini, nto Muluku onimoovonihani voomalela. Owo oohimya. Miyo kiroovekela paahi n’uhela matata aka wamaaru wawe, nto owo kuhimya wira aaniwerya wiiwa etthu. Vaareera, mutthikele vano, mwaaminiki munoorowa wiiwa oratta-ene, ni munimwiwa.

Itampi sothene ti soolampwa, munna? [Munna muthiyana oniira, “Ayo.”—Mol.] Moolikana wira mwaakhele openuwa wanyu? [“Ayo.”]

213 Muluku Oophenteya, kinimwiixaatherya matata munn’aka, nisuwelaka wira mwa hiyo khiivo etthu yoorera, mmansihu. Masi hiyo noosuwela wira hiyo n’aKristu, ooyariwa ni Erooho ya Muluku. Nto hiyo ninimwiixaatherya matata munn’ihu ni ovekela ovonihiwa wawe, mwa Nsina na Yesu Kristu. Amen.

214 Vano munnaamini wira munoorowa ovonihiwa? [Munna muthiyana oniira, “Voolikana.”—Mol.] Vaareera, vano nyuwo—moovonihiwa. Eyo t’inamuna yo wira. Ti yeeyo. Ekeekhai.

215 Itampi sothene ti soolampwa? [Munna muthiyana oniira, “Ayo, mulopwana.”—Mol.] Ni moolikana wira mwaakhele openuwa wanyu? [“Ayo.”] Nyuwo munnaamini, wira ni wiixatherya matata, wira Muluku Yoowo onsuwela mirima s’atthu, onimoovonihani? [“Miyo kinnamini.”]

216 Tith’ihu a Wirimu, miyo kinvekela wira Nyuwo munvonihe munn’ihu, okathi onimwiixaathery’ahu matata n’uvekela mwa Nsina na Yesu Kristu wira Nyuwo munvonihe. Amen.

217 Ehaali anyu? Vekeekhai, moosuwela wira koosuwela etthu evonyeiye ni nyuwo. Masi kahi kinoohimya paahi; okhala wira, moosuwela, eyo eno—eyo enoottthikela erowaka ni erowaka. Masi nyuwo mwa... Itampi sothene ti soolampwa? [Munna muthiyana oniira, “Ayo, mulopwana.”—Mol.] Ni munnaamini wira Muluku onimookhalihani mukumi? [“Ayo, mulopwana.”] Nyuwo munnaamini wira wiipa makhonyokhonyo... Koomala ohimya.

Muluku Oophenteya, miyo kinvekela wira Nyuwo mmukhaliherye ni munvonihe. Munivahe, mwa Nsina na Yesu.

Khamunrowa orakala. Rowakani, mwaamini ni murima wothene.

218 Munnaamini wira Muluku onimoovonihani? [Munna muthiyana oniira, “Amen.”—Mol.] Itampi sothene ti soolampwa ni nyuwo moolikana wira mwaakhele ovonihiwa wanyu? Nyuwo munnaamini wira muthana anyu onookhala saana?

Tithi a Wirimu oophenteya, miyo kinvekela wira Nyuwo munvonihe ni mmukhalihe mukumi. Mwa Nsina na Yesu Kristu, ekhale siiso. Amen.

Muluku ooreeriheni, munna. Muroweke, mwaaminiki vano.

Itampi sothene soolampwa, munna, moolikana wira mwaakhele ovonihiwa wanyu?

Muluku Oophenteya, itampi sawe, owo onihimya wira, soolampwa. Kinimwiixaatherya matata muthiyan’ola, mwa Nsina na Yesu Kristu, kinvekela ovonihiwa wawe. Amen.

219 Itampi sothene ti soolampwa? Nyuwo muhaana okhala oratteene, khamureere owereiwa, nyuwo moosuwela eyo. Nyuwo moosuwela wira koosuwela etthu evonyeiye ni nyuwo. Ni munnaamini wira Muluku onimookhalihani mukumi, ovoniha murim'anyu ni wookhalihani saana voomalela?

Muluku Oophenteya, miyo kinvekela wira mwa Nsina na Yesu Kristu, wira Nyuwo munvonihe ni mmukhalihe mukumi. Ela emuhiye, Tithi, mwa Nsina na Yesu. Amen.

Muluku ooreeriheni vano. Muhihoverye. Muroweke, mwaaminiki.

Itampi sothene soolampwa? Moolikana wira nvonihiwe?

Tithi a Wirimu oophenteya, kinnimwiixaatherya matata munn'aka. Mwa Nsina na Yesu Kristu, avonihiwe. Amen.

Muhihoverye. Rowakani, mwaaminiki.

Itampi sothene soolampwa, nyuwo moolikana wira nvonihiwe?

220 Tithi a Wirimu oophenteya, miyo kinvekela wira Nyuwo munvonihe munn'ihu, mmukhalihe mukumi. Munivahe, Tithi. Kinimwiixaatherya matata, ni etthunelo yeela, mwa Nsina na Yesu Kristu. Amen.

Muluku ooreeriheni. Miyo kinnaamini ni murima aka wothene.

Nyuwo munnaamini vano, munna? Itampi sothene ti soolampwa ni moolikana wira nvonihiwe?

Muluku Oophenteya, kinimwiixaatherya matata munn'aka, mwa Nsina na Yesu Kristu, avonihiwe wira okhale ovuwa Wanyu. Amen.

221 Vano imaara sinci-ene ntoko yoowo, okwannya vamosa paahi, ntoko Yesu sihimaly'awe, "Ithoonyeryo iya sinimwaathara ale anaamini. Awo yawiixaatherya matata aya aretta." Koopacerya woona wira, mmithukumanoni, wira ela enniruuha ephwanyeryo ipursento miloko mithanu vanci-ene ovikana yaahaniwaka atthu muliinyani, okhalana olamula sa mmurimani, okhala wira aniphwanyiwa vakhani paahi. Nto, mwa enamuna yeela, aakhala anci-ene anvonihiwa.

222 Nyuwo moolapa itampi sanyu sothene sa ohaamini ni itthu sothene? Munnaamini vano wira munoorowa ovonihiwa? [Munna muthiyana oniira, "Ayo, ni ovuluxiwa."—Mol.]

Muluku Oophenteya, kinvekela wira munvonihe minn'ihu kivarelaka matata awe ni kinvekela mwa Nsina na Yesu Kristu wira avonihiwe. Amen.

Muluku ooreeriheni, murokor'aka.

Munnaamini vano? [Munna muthiyana oniira, "Ayo."—Mol.] Itampi sothene ti soolampwa? ["Ayo."]

Muluku Oophenteya, kinimwiixaatherya matata munn'aka, mwa Nsina na Yesu Kristu, wira avonihawe. Amen.

Muluku ooreeriheni, murokor'aka.

Enikhala ntoko etthu yooyevaxa, masi ti Muluku olaihenrye.

Itampi ti soolampwa?

Muluku Oophenteya, kinvekela wira Nyuwo munvonihe munn'ihu ola. Kimwiixaatheryaka matata mwa Nsina na Yesu Kristu, owo arowe akhale mukumi. Amen.

Itampi ti soolampwa?

Muluku Oophenteya, kinvekela wira munvonihe munn'ihu, okathi onimwiixaathery'aka matata, mwa Nsina na Yesu Kristu. Amen.

Vano okathi onrwaanyu ni ekaruma, eyo ephwanye eyeettiheryo, enoovara muteko.

Itampi ti soolampwa? [Munna muthiyana onnaakhula—Mol.] Moolikana.

Muluku Ootthuneya, miyo kinvekela wira Nyuwo munvonihe ni mmukhalihe mukumi, mwa Nsina na Yesu Kristu. Amen.

Muluku ooreeriheni, murokor'aka.

Itampi sothene soolampwa? [Munna muthiyana oniira, "Itthu sothene."—Mol.]

Muluku Oophenteya, enamuna muthiyana'ola onikiwehawe mmaithoni, kinnaamini yeeyo. Kinvekela wira Nyuwo munvonihe, mwa Nsina na Yesu.

²²³ Nyuwo munoomuruuha paahi, kahi siiso, munna? Nyuwo munoomuruuha paahi? Vaareera. Munnaamini, munna, wira Muluku onimoovonihani? [Munna muthiyana oniira, "Kinnaamini wira Muluku aamuwerya okivaha-tho wona."—Mol.] Muluku ooreeriheni.

²²⁴ Tithi a Wirimu, Nyuwo okathi wothene munnaamorela ikharari ale oohoona, ni oothoiwa. Vano awo ahoona etthu Nyuwo mwiinre-anyu ohiy'ula. Tivo hiyo ninnaamini, Pwiya, ethoonyeryo ela yuulupale yookiserya eneetteetta eriyari ahu vano. Kinvekela wira wona wa muthiyana'ola ohinoona omurweele, mwa Nsina na Yesu Kristu. Amen.

Vano, munihimeerye vano. Muhimye.

[Munna mmosa muthiyana onlavula ni Munna Branham—Mol.] Oh, ayo, munnaamini wira Muluku onimoovonihani? ["Aleluya!"]

Tithi a Wirimu oophenteya miyo kinimwiixaatherya matata munn'aka ni kinvekela wira Nyuwo munvonihe, mwa Nsina na Yesu Kristu. Amen.

Muluku ooreeriheni, munna. Nrowe niiwe moota nyuwo—moota munrowaanyu.

Munnaamini, munna? [Munna muthiyana oniira, “Ayo, kinnaamini.”—Mol.]

O Tithi a Wirimu oophenteya, miyo kininkelela munn’ihu, kiroromelaka wira Nyuwo munoonvoniha vano. Kinimwiixaatherya matata, mwa Nsina na Yesu Kristu.

Vano mwaamini. Ti yeeyo. Murowe paahi, mwaaminiki.

Munnaamini, munna? [Munna oniira, “Ayo.”—Mol.] Itampi sothene soolampwa?

Muluku Oophenteya, miyo kinvekela wira Nyuwo munvonihe munn’ihu ni mmukhalihe mukumi, mwa Nsina na Yesu Kristu. Amen.

Munnaamini, munna?

²²⁵ O Muluku, kinvekela wira, mwa Nsina na Yesu Kristu, voowiiyeviha, ni wiisumaaliha wa okathi ula, wira Erooho Yoowaarya emukhalihe muthiyan’ola mukumi. [Munna muthiyana oniira, “Ni kinvekela, munvekelele mwan’aka mulopwana. Nkinimoona mwa miyaakha miloko miili.”—Mol.] Miyo kinvekela wira Muluku ooveleeliheryeni mwan’inyu, munna, oophenteya. Muluku ooreeriheni.

Tithi Oophenteya, kininkelela munn’ihu va. Mwa osivela wa Erooho Yoowaarya, wira Eyo erwe vano envonihe munn’ihu, mwa Nsina na Yesu. Amen.

Mureerihwe, munna.

Muluku Oophenteya, miyo kininkelela munn’aka, eemenle va ni kinimwiixaatherya matata, ni kinvekela ovonihiwa wawe, mwa Nsina na Yesu.

Mureerihwe, munn’aka. Vaareera.

Mwammiravo?

Muluku Oophenteya, kimwiixatheryaka matata mwaamukhaani ula, miyo kinnimureerihwa mwa Nsina na Yesu Kristu, wira avonihiwe.

Munnaamini vano, munna? [Munna muthiyana oniira, “Ayo.”—Mol.] Ni nyuwo muntthuna ovekeleliwa?

²²⁶ Muluku Oophenteya, miyo kinninkelela, okathi onimwiixaathery’aka matata. Vano, nno t’uri oniruma Wanyu, eyo t’ile Nyuwo muhimaly’anyu wira niire, “Ithooneryo iya sinimwaatthara ale anrowa waamini. Awo yawiixaatherya matata aretta, awo anoopenuwa.” Nyuwo moohimya, Pwiya. Amen.

Vano, Owo oohimya yeeyo, khohimye? Ehaana wiireya siiso, munna.

Muluku Oophenteya, miyo kinvekela wira Nyuwo munvonihe munn’ihu ni mmukhalihe mukumi, mwa Nsina na Yesu Kristu. Amen. Muluku ooreeriheni, murokor’aka.

Murwiiye mwaaminiki, munna?

227 Tithi a Wirimu oophenteya, miyo kinvekela iparackha Sanyu mwa murokor'ihu, niiwelelaka paahi ele Nyuwo muhimaly'anyu wira niire. Nyuwo muhimmye wira, "Ithoonyeryo iya sinimwaatthara ale anaamini. Awo yawiixaatherya matata aretta," Nyuwo muhimmye wira, "awo anoopenuwa."

228 Kitthuniheriwe weemela vaava okathi vakhani paahi, wira kihimye mwa yeela, wira kaahiye atthu omumula vakhani paahi, okathi vakhani paahi. Namuulumela mmosa emaara emosa, aakiirende wira, khiyaari siiso. Masi, nyuwo moone, Owo ohimmye wira, "Ithoonyeryo iya sinimwaatthara."

229 Nyuwo muhiwa Mutthaka aka *Ophuka*, omuhela Yesu moophukiwani. Moone, Owo aahimuhimeerya Nowe, "Enoorowa orupa epula." Khiyaarumpe epula mwa miyaakha emiya emosa ni miloko miili, masi nnakhala vo epula yaahirupa. Owo aahimuleela Abrahamu wira aamukhalana mwaana ni Saara. Saari miyaakha miloko miili ni mithanu ohoolo waya. Owo khaahimmye liini. Owo aahimmye wira awo yaamukhalana mwaana. Miyaakha miloko miili ni mithanu ohoolo waya, khwiiraneya. Moone, Owo khohimmye liini.

230 Owo ohimmye wira, "Mavekelo o waamini anoowopola aretta. Muluku onimwaavenxa. Awo yawiixaatherya matata aretta, awo anoopenuwa." Ti yeeyo Owo ohimmy'awe? Owo khohimmye wira yaamutupha ni wira naanaanoru. Owo ohimmye wira, "Awo anoopenuwa." Moone, owo ti natiri Awe. Ti yeeyo hiyo enaamini ahu.

Murwe, munna. Munnaamini wira eyo ekeekhaii? [Munna muthiyana oniira, "Ayo, kinnaamini."—Mol.] Vano khiivo enamuna yo okhoothiherya nyuwo ovonihiwa.

Kinimwiixaatherya matata munn'aka, mwa Nsina na Yesu Kristu, wira ovonihiwe. Amen.

Munnaamini, munna? [Munna muthiyana oniira, "Ayo."—Mol.] Itampi sothene soolampwa, ni moolikana?

Muluku Oophenteya, miyo kinimwiixaatherya matata munn'aka, kiiwelelaka yooruma Anyu, ni kinvekela ovonihiwa wawe, mwa Nsina na Yesu. Amen.

231 Kintthuna wira nyuwo munvekeleliwa, mukiirele exontte. Kintthuna wira muhimyeke, mithukumano iya sihinatthi omala, etthu eniiraneya; ni muhiye paahi muthukumano, atthu akina, moone etthu eniiraneya vekeekhai. Khino meelo, nihiku noottharelana, wala okathi, nyuwo nwehe paahi etthu eniiraneya.

232 Ekureyu aka enooniherya wira ti—ti yoovirikana vanci-ene ovikana waahiya awo weererya, wehererya waamini waya. Okhala wira, Yesu ohimmye wira, "Awo anoowiixaatherya matata. Awo anoowiixaatherya matata, anoopenuwa." Vano

mwiwe saana etthu Owo ohimyaawe. Owo khohimye wira awo yaamutupha ni otthimaka nno ni nno. Awo yaamuwerya wira eyo. Masi Owo ohimye wira, “Awo anoopenuwa.” Ti yeeyo Owo ohimya’awe? Ti yeeyo Owo ohimya’awe. Ti yeeyo kinaamini aka. Nto Owo ori vaava naanaano, Ole ohimye wira Masu ari va wira akhalihe siiso.

Munnaamini, mulopwana? [Munna oniira, “Amen.”—Mol.]

Tithi a Wirimu oophenteya, ni olapa wawe wo waamini wawe ni aaminiki, miyo kinnimwiixaatherya matata, mwa Nsina na Yesu Kristu, wira ovonihiwe.

Muluku Oophenteya, kinimwiixaatherya matata muthiyan’ola, mwa Nsina na Yesu Kristu, wira ovonihiwe. Vaareera.

Tithi Oophenteya, kinnimwiixaatherya matata muthiyan’ola, mwa Nsina na Yesu Kristu, wira ovonihiwe. Nyuwo moohimya, “Owo onoopenuwa.”

Moolikana wira nvonihwe, munna?

Muluku Ootthuneya, kinimwiixaatherya matata, mwa Nsina na Yesu Kristu, wira Nyuwo munvonihe.

Vaareera, munna, oophentiwa, sothene soolikana wira nvonihwe? Waamini wanyu woomaliheriwa, munnaamini wira munoorowa okhala mukumi?

²³³ Nto, Muluku, miyo kinimwiixaatherya matata aka, kiiweleleka yooruma Anyu “Mulaponi mothene, khula yoopattuxiwa.” Kinimwiixaatherya matata, mwa Nsina na Yesu, wira ovonihiwe.

Muluku Oophenteya, kinimwiixaatherya matata munn’aka, mwa Nsina na Yesu Kristu, wira ovonihiwe.

Muluku Oophenteya, kinimwiixaatherya matata munn’aka, mwa Nsina na Yesu Kristu, wira ovonihiwe.

[Nipuro vahiitthu mufiitani—Mol.]...akhuruwelaka munvireloni. Miyo nkaatthuna woomankihani paahi. Munookhala saana mwaaminiru yeeyo vano.

Muluku Oophenteya, kinvekela wira munvonihe munn’aka, mwa Nsina na Yesu Kristu. Amen.

[Nipuro vahiitthu mufiitani—Mol.]...wira akikhaliherye waavekelela atthu ala.

²³⁴ Vano hiyo nookhalana maleeso kamosa-kamosa va, ni sikina, mu, wira avekeleliwe. Ni kintthuna wira mutthikele ovekela ni miyo vano, vano, mahuta ala makhaani, vano. Miyo koosuwela wira ela eniweya vootikiniha vanci-ene w’atthu ovekelela etthu yaamukhaani ntoko ela. Masi vaakhanle wira mwaamuwerya ovolowa muskiritooriyu mwaka, emaara emosa, nto nweha paahi. Vaakhanle wira naahisuka onamoona moovirani mwa miyaakha iya, kinoona wira khivaaweryaney

wuukela vaplataforma va, avonihawe mwaha wo oveleeliherya ikuwo soovekeleliwa ntoko ela, imilyawu a yaawo, imaara sinciene mulaponi. Vano, nyuwo moosuwela exeeni iyo—exeeni iyo?

Akhale mutthu onttotta nleeso nlo vo na owo—mmiravo owo. . . Munooosuwela nleeso nanyu, kahi siiso, munna? Vaarera.

²³⁵ Ni kinniwoonaka axinamwane, oorakala ovonihawa. Nto moone nyuwo, exeeni ila, nlo nipuro no okwannya paahi, ntoko Oral Roberts saahimyakaawe. Nla nipuro no okwannya paahi. Hiyo ninoovekela. Vano, hiyo khanniira ela mmansihu, hiyo niniira ela okhala wira Bibilia onniruma wira yeela. Hiyo othene noosuwela wira eyo ekeekhahi.

²³⁶ Vano, aakhala athu anci-ene anttikithela maleeso, ni sikina. Ahe, vano, hiyo nnuupuwela wira eyo ti yoolikana, vekeekhahi, masi hiyo paahi. . . Bibilia khohimye wira awo “yaattikithela” maleeso.

²³⁷ “Masi yaanikuxiwa veerutthuni va Paulo maleeso.” Vano munnoona etthu kaahimyaaka? Vano, etthu awo yoonanse aya, owerya iwe woovaha ekumi waari mwa Paulo, awo yaasuwelaaya wira owo aari murumeyi a Muluku. Awo yaanisuwela wira Muluku aari mwa yoowo. Awo yaahisuwela wira sothene owo aakwannyaawe saakhala sooreerihwa. Akavi aniiwa saana yeeyo? Mwiire, “Amen.” [Muthukumano oniira, “Amen.”—Mol.]

²³⁸ Moosuwela, kinoona wira Paulo aatthariha Yooolempwa saana mwa etthu aairaawe. Nyu khamunuupuwela siiso? Munthuna wira kooleleni nipuro kinuupuwel’aka wira taaphwannyaawe muupuwelo wo wira yeeyo? [Ookhala oniira, “Mwa Elisewu.”—Mol.] Mwa Elisewu, ti yeeyo. Moone, Eliya iirale, “Mmukuxe ttootto ola mwampweherye mwaana.” Nto profeta aanveleelinhe ttootto okhala wira aanisuwela wira sothene owo aakwaannyaawe aanireerihwa. Owo aanisuwela vooপুরoni vawe. Owo. . . owo aawenrye-ru omwiiriha muthiyani’owo waamini etthu emosaru.

Vano moone, vano, Bibilia hata khohimye wira, “Awo animwaavekelela aretta.” Ohimye wira, “Anooiixaatherya matata aretta.”

²³⁹ Vano muupuwele paahi, athu yaahoona, mwa murummwa Petru, Mukhalelo wa Muluku wooniheriwe mwa mulopwan’ola, mpakha awo—awo yaawaatalelaaya athu veerukuni vawe, nto awo yaanivonihwa. Akavi anisuwela wira eyo ti Yooolempwa? Eyo ti Yooolempwa voolikana ntoko Yohani 3:16. Moone, Awo othene Masu a Muluku. Vano, athu, nyuwo moosuwela wira eruku ya mulopwan’owo khiyaavoniha athu.

²⁴⁰ Masi, nkawehani, vakhala wira owerya wa Muluku waari mwa profet’ole, mwa miyaakha ni miyaakha owo vaakhwiyaawe, mpakha mulopwana mmosa aakhwiye oriheleliwa veerutthuni vawe, makhuva awe. Erutthu ene hata khiyaakhanle vo; makhuva ti yaari vale. Nto Mukhalelo wa Muluku waari

vasulu va makhuva ale, mpakha mutthu ule ookhwa otthikela mw'ekumini.

241 Vano khamunsuwela wira Muluku mmosaru yoowo oirale itthu iyo sothene ori vaava ohiy'ula? Wa—wa miyo, kinoona wira hiyo naahaana okhala atthu ootepaxa otteeliwa murima mulaponi mothene. Muupuwele paahi yeela.

242 Miyo—miyo kinwehererya wira nkoonihale muthukumano aka wira waamini wira eyo etthu emosa miyo kiniiraaka mmansaka. Nyuwo—nyuwo munnisuwela wira kahi yeeyo. Miyo, miyo ka munn'inyu, moone, nto miyo ka munn'inyu paahi.

243 Masi miyo koosuwela, miyo ka namasuwela ela, wira Muluku ori vaava. Ni kinnisuwela wira Owo oonivaha etthu, nihinweryaahu oleeliherya, ni Masu a Muluku paahi, anihimya wira eyo yaamukhala vaava okathi yoola. Siiso, eyo ennivaha osuwanyeiha wira nisuwele wira ninkhala mahiku ookiserya. Enninvaha osuwanyeiha wira nisuwele wira atthu ala, oothanliwa ola, oothanleliwa, oowihaneliwa okhuma, ootthommwa. . .

244 Vano, nlo nuulumo nuulupale, *ootthommwa*, masi hiyo othene noosuwela wira eyo ekeekhaii. Hiyo vekeekhai noosuwela wira Muluku ohinimala orootthoma itthu sothene khalayi ene mwaha w'osuwela khalayi ene ohinatthi opattuxiwa olumwenku, hata Mwaapwittipwitthi aahiiviwa; ni khula nsina naarowa okhalaka muLiivuruni, niheliwe muLiivuruni Eliivuru ene ehinatthi olempha. Vano akavi anuwela wira eyo ekeekhaii?

245 Nto Yesu khurwa wira—wira aavuluxe ale yaari muLiivuruni. mBibiliani, Mwaapwittipwitthi aarwiye okhuma wiithela va ekuwo, khukuxa Eliivuru khutaphula Ikanyeryo Eyo saatthukaniwe-aya, okhala wira Owo aarwenle ovekela ottikiheriwa sothene iye Owo aavulunxaawe. Owo ti Mulapeli vano, Mulapeli axontelaka mwaha w'ale Owo aavulunxaawe. Othene ole nsina nawe nilempwe muLiivuruni mwa Mwaapwittipwitthi, oovuluxiwa.

246 Ntoko saahimalyaaka nuulumo nimosa noolipa ohiyu mukina. . . Kinlipelela e. . . maleeso ala othene va. Miyo nkineererya olaleerya-tho, masi miyo kihimye paahi wira naahikhala nuulumo naamukhaani. . . Kinwehererya wira ela kheniweya ntoko oveeha, moone. Masi ntoko mulimi aamuhlenle muttehi, nawe ahaarina mooce yaaphiyerya, tivo owo khuttotta nooce na xawawe, nto khuhela vathi va mwalyakhu muttehi wira uuramele vano owo khimutothola xawawe. Nto owo aari ootepaxa otikiniha eriyari y'alyakhu othene, okhala wira awo khayoono itthu enamuna emosaru. Masi ele yaari yothene owo aatonko awe woona, aari mwalyakhu. Owo aaiwa nsu nimosa paahi, nahaalikana ni nsu nawe. Nnakhala owo khaawerya okumiha nsu ntoko muttehi wala alyakhu axikhaani.

Owo khaasiveliwa ni elyelo aya, okhala wira awo yaalyaasa mweehilini. Yaahikhala etthu yoovirikana n'uwo, nnakhala vo owo khaasuwela yaari evirikanelo xeeni.

247 Vano nto nihiku nimosa, vale aari maama xawawe aasuwela wira aahirela eyaattelo khata ya mooce. Ni vale naaphwanyaneya nimosa wa mooce yaale, naari wira okhale mwan'awe, naanilahlela. Tivo owo aahirowa amwaavyaka, nto khumphwanya mweehilini. Vano owo khukhuwela. Nto okathi okhuwenly'awe, xawawe mwaamukhaani aanisuwela nsu n'ame awe. Ntoko Yesu sihimaly'awe, "Ipwittipwitthi Saka sinnisuwela Nsu Naka."

248 Kinoona wira, nsana ohiyu, okathi woonaly'aka epaineeli ele ya aPatista, maPrespiteriyaano, n'akina-tho, siiso awo aleliwe-ene vathi wa mwalyakhu. Mukilevelele, munna, moone. Masi Maama aahisuwela wira aahikhala oophentiwa Awe nipuro nlo iwe. Tivo axilopwana ale yaaphwanyaneya iwe, khiyaawanelasa yoolya yaakhelanse aya ni mwalyakhu maama, ni siiso, masi vano awo t'axawawe, moone, awo anvavelasa yoolya aya. Munnona?

249 Ni miyo kinoona wira ekereja etthu emosa ntoko yookhumelela miyo koonalyaaka woohikhala khalayi, kikhumaka oTucson, ahiiso okhuma—okhuma oPhoenix, kirowaka oTucson. Kaahoono etthu yootikiniha. Ni yaahikisikulihya murima, woono etthu yaakhumelenle, moota. . . ekhololo emosa, yaavavaka osulu, munn'awe xawawe ekhanle muthinto wa ekereja.

Nto Yehova ti Xawawe. Owo aawiihanne maprofeta Awe "axawawe." Owo aahiisihana Mmansawe, Yehova, "Xawawe."

250 Masi ekhololo ela yoopwetexa osuwanyeya waya khalayi, okhala wira eyo kheneetteetta musulu ni oxaya yoolya aya ntoko sathhuneyaaya wira. Masi enikilaathi mufiiyuni sa ateleoni ni wira ntoko namathola. Eyo—eyo enaaxaya anamarokolo ookhwa ikaaro siwiivalyaaya, nto owo ni amarepo anoorowasa iwe n'ulya vamosa. Owo onootuphatupha ntoko marepo, ohiya weetta ntoko saathhuneyaaya weetta. Owo oopwetexa osuwanyeya wawe.

251 Nto miyo kinihimya ela ni ophenta wothene wa othunku ni nttittimiho, ekereja yoopwetexa osuwanyeya waya khalayi ntoko munna xawawe. Eyo enookilaathi vale. Ohiya okela moowiixerya mwa Masu ni osuwela vakhala wira ithu iya ti soolikana, eyo enliplelela nikuttha na ilepeliwo sa exikola ya Ttiminku ipakiwe nnikhuru na atthu oosoma nipuro nlo, namarokolo ookhwa oiviwe nipuro nikina. Ontuphatupha ntoko marepo! Muluku anikhaliherye ovava nirowaka ottaiwene wa yeeyo.

Anatiri ala t'ekeekhai. Kahi ele mutthu ohimmyaawe mwaha wa Yeeyo, masi etthu Muluku ohimmyaawe mwaha wa

yaawo! Awo t'ekeekhai. Miyo nkireere otteeliwa murima mwaha w'opatthana ni axawawe.

Nrowe naavekelele hothe aretta ahu.

²⁵² Tithi a Wirimu oophenteya, ennixuttihiwa mBibiliyani wira yaanikuxiwa v'erutthuni va Paulo, maleeso ni ikuwo, nto axetwani yaanaakhuma atthu, ni irooho sootakhala saanaahiya. Vano, Tithi, miyo keemenle va vasulu va maleeso ala, kinimuthoonyerya khula mutthu ori vaava. Eyo Erutthu ya Kristu, hiyo vamosa. Hiyo ninnihimya, ni mahala n'uphenta, wira niri va wira nimuthoonyerye Mwaakameliwa Awe, ni naaminiki, oopatthana ni Yoowo Momweneni mwAwe. Ni hiyo noosuwela wira khanihiyo Paulo Oowaarya, masi noosuwela wira Nyuwo nlelo mwa Yesu.

²⁵³ Ni ninvekela wira Nyuwo muttittimihe waamini w'atthu ala. Awo yaakhanleru khalayi wu mahiku a Paulo, yaamwiira yiiwale-ene Ehapri yooreera yeela emosaru, yonale-ene itthu seiya. Tivo, awo muthinto mmosaru w'atthu. Nyuwo mwa Muluku mmosaru. Vano miyo kinnivekela, Muluku Oophenteya, wira Nyuwo muttittimihe waamini waya, ntoko saawiireny'anyu ale mahiku a Bibilia. Ni wira khula owerya wa xetwani, khula eretta, khula muxankiho, waatthunke atthu ala maleeso ala ni mahuta ala va anthoonyeryaaya, owerya iwo wootakhala wa eretta waahiye.


²⁵⁴ Yaahihimmwa, emaara emosa, wira Isarayeli eetta ottharihaka muteko, orowaka muttetthe wa natiri. Nto naanaanoru ottharihaka muteko, nwanani aahirwa khwakuttelela vanloothoni, ni Ephareya Yooxeerya khwaakhottiherya okelela ohoolo ettharihaka muteko, ni moweettani mwaya. Nto Muluku khuweha vathi okhuma wirimu, ovira mwa Nlumi na Mooro, vano ephareya yaahoova. Khuvilikeiherya ottuli mawimpi aya, okhala wira mawimpi a Muluku yaari vathi va ephareya. Nto Eyo yaahaatthukulela ephiro aana Awe, yeetta yiiwelelaka.

²⁵⁵ Vano, Muluku, vakhala wira Ephareya Yooxeerya yaahoova, khuvilikeiherya mawimpi aya ottuli, khuvilikeiherya ottuli maasi aya, khwaavaha opuro aana yeetta mukwaha yeetta yiiwelelaka; Muluku oophenteya, ohiy'ula, nwehe vathi ovira Ephome ya Mwan'Inyu, Yesu, Yoowo omulampe natiri. Nto okathi maleeso ala aniheleliwaaya irutthu sinwereiwa s'atthu, maitho a Muluku ewehe, ni eretta eyo, xetwani uwo, oove ni ohuluwe. Ni wira atthu etthikele mukwaha erowaka Muttetthe wa nitiri, ni ekumi yooreera ni ikuru. Okathi Isarayeli eettaawe mothakoni, khaakhanle hata mutthu ootteettheya eriyari aya, omukaanoni okina. Evahiwe atthu ala, Tithi, maana hiyo ninveleliha maleeso ala, mwa Nsina na Yesu Kristu. Amen.

²⁵⁶ Muluku ooreeriheni, khula mmosa. Mukuxaka maleeso anyu vano, mwaamini ni murima wothene. Munnaamini wira Muluku

onniwa yeela? Munnona? Miyo—miyo kintthuna kihimye ela. Muhi, muhihoverye, hata vakhani. Moone, pooti ekhalaka ntoko yootikiniha saana. Mukilevelele, minuutu mmosa paahi. Muhihoverye, hata vakhani. Masi mwaamini vano wira, etthu hiyo evekenly'ahu, Muluku onnivaha.

²⁵⁷ Munnaamini wira owo ti Muluku va, onsuwela isiiri sa mmurimani mwanyu? Nyuwo munnisuwela ni waamini wira owo Mulukuu? Vano mulipiherye paahi muupuwelo anyu vano, khekhanle okhalaka hat'etthu ekina. Munnona?

²⁵⁸ Vano, anghi waakhanle meelo wuulupale, miyaakha sinci-ene sivinre ola aarowa okhala wahala. Nto atthu, mwa miyaakha sinrwa, vaakhanle wira ekhale etthu ene, awo jaarwiiye ni wira, "Ahe, kaakhanleru okathi yoole, koonaleru eyo wiiriwa, mmiravo, eyo ti jaarowa okhala yothene kaarowaaka otthuna osuwela. Kaamwaamini eyo okathi ene yoowo!" Moone, etthu emosaru nyuwo munaamini anyu, mwaakhanleru ottuli wu okathi Owo iiraly'awe nto! Muupuwele, nlelo ti Yoowo. Eyo Ekumi Awe mwa nyuwo. Muluku ooreeriheni. 

WOONIHERYA MASU AWE EMK65-0426
(Proving His Word)

Mutthak'ola wa Munna William Marrion Branham, opaceryawene olaleeriwe ni Enkelesi Esekunta ohiyu, mahiku yeetaka 26 mweeri wa Abril, 1965, mwaha wo Opatthana wa Mulaponi wothene wa Alipa a Nakoso a Ehapari yooreera Yoomalela oEmbassy Hotel oLos Angeles, California, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org